

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guitz xcuent guiraa redzuun ni gujc nez loonu te cuäxnejzreni redzuunga

² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu.

³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo,

⁴ te gachesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdo bixhoz Aarón.

⁶ Guiro'preni najcreni nadolajz nez loj Dios, ru-soobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl.

⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laḷ ni cayujn Zacarías dzuun nen guidoro si'c bixhojz nez loj Dios,

⁹ dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni.

¹⁰ Lal ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios.

¹¹ Dxejcti baluiloj te xangl Dios lo Zacarías, suliini ladbee lo dxan cadre cayejc guxhyaal.

¹² Che bahuu Zacarías lo xangl Dios, di jien xhi gunni, lacti bidxebduxhni.

¹³ Sas xangl Dios räjp lojni:

—Na'c guidxejblu, Zacarí, sa'csi Dios abiejn diajgni xtiidxlu, luxh su' te xi'n cháálu, Elisabe't; cuälajluni Juan.

¹⁴ Sibalazduxhlu, siroob lastoolu; xhidajl bejn sibalajz sa'csi gaalni,

¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxaan xten Dios nen lastooni cheni gaallini.

¹⁶ Sujnni gusiechlajz xhidajl rexpejn Israel, guibi'reni lo Gueb Dios.

¹⁷ Juanre sinijdni loj Dad, sujni lagajc xhigab, sajpní lagajc yälrnibee ni gojp profe't Elías, te che jiejn diajgreni xtiidxni susiechlajz redad, susiäjlzarení diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jädsucheeni lastoo rebejn te chalilajzreni xtidx Dad ni jääd.

¹⁸ Gunabdiidx Zacarí loj anglga, räjpni:

—¿Xho mood gacheä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnää didxhueenre lojlu.

²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisac̄lu. Rextidxä sisiojb che guidzujñ dxej che riäjñ gacni.

²¹ Lañni cayajc dee, cadxeloj rebejñ ni suga' nez ro' yudxan cabäjzreni guir̄ii Zacaríi sa'csi cayaclaani neñ yudxan.

²² Che bir̄ii Zacaríi, di niajcdiru niniini loj rebejñ; dxejc gucbeereni yu' xhi cosro bahuiini neñ yudxan xten guidoo. Dxejc con seen guninäjni rebejñga, sa'csi xheti xse'ni te niniini.

²³ Che gulujx bejñni dzuun neñ guidoro, gubi'ni rolizni.

²⁴ Che gudejd redxej dxejcti bazeñ nuu Elisabe't, chäälni, báz, gaii bäii diruni nir̄ii rolizni. Bejñni xhigab, räjpni:

²⁵ “Si'c bejñ Dad Dios narä naj, gucnäjni narä te diru bejñ cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäii, baxhal Dios xanglni Gabriel lo te guedx Galilee ni laa Nazare't,

²⁷ te chahuiini te dxapxteeb ni laa Marii. Agojt xtiidxni te guchñaani te dade' ni laa José. Dade're najc xagdoo torei David.

²⁸ Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjl̄u. Abenle' Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?”

³⁰ Dxejc räjp xangl Dios lojni:

—Na'c guidxejblu, Marii; agule Dios luj.

³¹ Bacuadiajg diidx. Suulu báz, su' te xi'nlu. Che gaalni guirilajni Jesús.

³² Laani sajcni te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni rei sigajc ni gujc toxtadgoldooni David,

³³ te tejpas guinibeeni loj rexi'n Israel, luxh dipac xcälrnibeeni nitloj.

³⁴ Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpni:

—Sprit Dxan xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcni te bendxan, sibälaj bejnni Xi'n Dios.

³⁶ Näjza sa'lu Elisabe't su' te xi'nni luxh anajcni te beṅgool; ni'cni gunaa nani najreni digacdi chu xi'nni agujc xho'p bäii nuuni báz.

³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Neṅ redxejga, basquejn Marii sääni lo te guejdx ni tre' neṅ redajxn xten Judea.

40 Biu'ni rolizj Zacarí, guniini xtidxbee loj Elisabe't.

41 Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't.

42 Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu.

43 ¿Chu narä te siädhuii xnan Xtioozä narä?

44 Biejntis diagä xtiidxlu, bibalazgajc xi'nä, biniibni xque'ä.

45 Sibaa lajzlu, luj ni huililajz sisiojbpac nani gunii Xtadnu Dios.

46 Dxejc räjp Marii:

Xaimä rliä'p xpala'n Xtadnu Dios.

47 Rbalazduxhza lastoä xcuent Dios ni ruslaa narä lo dojl.

48 Sa'csi agule Dios narä,
nacä te mos gunaa ni xhet sajcdi,
luxh najli sinii rebejn näjza reni churu chu lo
guedxliuj,
chicbaani loj guiraa regunaa.

49 Sa'csi Gueb Dios ni rajp guiraa yälrnibee abejn
xhidajl cosro loä,
dxanduxh najc lajni.

50 Dini cuääz gulaslajzni guiraa rebejn ni riu xtiidxni, reni rajnni.

51 Xhidajl cosnagajñ abejnni con lagajc naani,
abatie'chni renani rustioob lastooreni rliä'p lagajc
xpala'nreni.

52 Abasajbni reni rnibee,
per rebennadolajz bejnñi gacreni benro.

53 Bachajni xque' reni calaan,

badeedni ganax cossa'c,
 niluxh badzu'ni rebejn ni yu' xhixtenreni xhet
 badeed dini lojreni.

⁵⁴ Gucnäjni nación xten xpejn Israel, ni najc xmos
 Dios.

Di lajzni niäl nulaslajznireni

⁵⁵ sa'csi si'c bia'nni diidx con retoxtadgoldoonu,
 sinuu gulazlajzni toAbram näjza rexagdooni par
 tejpas.

⁵⁶ Dxejc bia'n Marii rolijz Elisabe't si'cti chon
 bäii, dxejc gubisacni rolijzni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te
 báz niguini.

⁵⁸ Dxejc bidzujn rexpisinni näjza resa'ni
 biädhuiireni guiro'preni che gucebereni lacti
 hueen gujc Dios con laani. Bibalaznäjrenini.

⁵⁹ Che gudejd xhujn dxej, huinäreni bäze'ga
 chuni bee. Rlajz rebejn nirilaj bäze'ga si'c laa
 xtadni, Zacarí.

⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamilu ni laa
 si'c.

⁶² Dxejcti gunabdiidxreni con seen lo xtad
 bäze'ga te gacbeereni xho rlajzni guirilaj bäze'ga.

⁶³ Xtadni gunab te la' guijtz, dxejc bacuaani:
 “Lajni najc Juan.” Dxejc guiraareni bidxelojreni.

⁶⁴ Luxh lagajc dxejc gujc gunii Zacarí stehuält,
 dxejc guslojni calä'pni xpala'n Dios.

65 Bidxeloduxh rexpisiñreni xhini'c gujc ro'c. Luxh bire'ch diidx xcuent recosre guideb neñ redajn xten Judea.

66 Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacarí

67 Dxejcti biääd Sprit Dxiñ xten Dios neñ lastoo xtadni Zacarí, gusloj caniini rediidx ni badeed Dios lojni, räjpni:

68 Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejnñi, te siädguslaani nuurnu neñ dojl.

69 Abaxhalñi loonu te bejn ni rajp yälrusladuxh bejn neñ dojl.

Najcni te rexagdoo toxmosni David.

70 Lagajc si'cni badeed Dios gunii redade' ni bacuaa xtiidxni lo guijt galoo:

71 Suslaani nuurnu loj reni rdxe'ch loonu, näjza ladznäa rebejn ni gulälaz nurnu.

72 Te gulaslajzni retoxtadgoldoonu, te soob diidx ni bia'nni con rebejnğa.

73 Scree bia'nni diidx con toxtadgoldoonu, Abram:

74 Suslaani nuurnu ladznäa rebejn ni rdxe'ch loonu,

te na'c guidxeebnu chunu lojni gusoobnu xtiidxni, 75 con yälñabañsa'c näjza yälğuxhtis guiraa redxej ni guibajñnu.

76 Luxh luj, bäze', sirilajlu dade' nani rnii xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyula-
jzni,

⁷⁷ te gunlu gacbee rexpejn̄ni xho gac laani lo dojl,
te gac guibicaj xtoj̄lreni.

⁷⁸ Sa'csi Dios sanälajz bejn̄,
näjza rulaslajzni bejn̄ ni'cni xhaguibaali suxhałni
xi'n̄ni te jädn̄ani te dxecoob,

⁷⁹ te gusanijni lo rebejn̄ ni nabajn̄ lo yälxcäjy xten
dojl,

näjza rebejn̄ ni nabajn̄ lo xpalaa yälgujt,
te guluiini xho s̄anu lo xnez yälrbecdxilajz.

⁸⁰ Dxejc gunís biuxe'ga, guyuduxh xcäriejn̄ni
xcuent recos xten Dios. Gubajn̄ni nez loj reyubi-
jdz cheni bidzuj̄n̄li dxej che baluilojni loj rexpejn̄
Israel, che gusloj cagusule'ni xtidx Dios.

2

Che gojl Jesús

(Mt. 1:18-25)

¹ Neñ redxejga, gunibee Augusto César xcaj laj
rebejn̄ guideb guedxliuj lo xquijtzni.

² Ni'c nacobgujc yälbigabre cheni najc Cirenio
gobnadoro xten Siria.

³ Guiraa rebejn̄ nanab chääreni lagajc lajdxreni
te ro'c guigabreni.

⁴ Ni'cni bir̄ii José guedx Nazare't Galilee, te hui-
jni Judea, lo guedx Belén, cadro gojl toDavid, sa'csi
najc José xagdoo toDavid.

⁵ Huinäni Marii, nani guchñaani, huijreni guedx
Belén te ro'c guigabreni. Luxh nuu Marii b̄az.

⁶ Lalsi yu'reni guedx Belén, bidzuj̄n̄ dxej ni gaal
xi'n̄ Marii.

7 Ro'c gojl xi'n galooni, dxejc batejbnini te xzuudni. Dxejc gudixhnini cadre rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

8 Gajxh guejdxga guyu' gaii baxtoor cayajpreni xhiilreni lo niaa guxhijñ.

9 Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni.

10 Sas anglga räjp lojreni:

—Na'c guidxejbtu, narä siädnäã lojtu te didxsa'c ni suspalajz guiraa beñ guedxliuj.

11 Nadxej gojl neñ guejdx xten toDavid, tej ni gusläa bejn neñ dojl, laani najc Crist ni najc Dad.

12 Dee najc te seen lojtu, sidxäلتu bäze'ga nadejbnini neñ te xzuudni, naga'ni cadre rusälreni guijxh rajw reguidxaa.

13 Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

14 Collä'p xpala'n Dios ni yu' xhaguibaali.

Suchu yälrbecdxilajz lo rebeñ guedxliuj ni balazlazjni.

15 Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

16 Rusquenduxhreni sääreni, dxejc bidxälreni Marii näjza José näjza bäze' ni naga' neñ cadre rusälreni guijxh rajw reguidxaa.

17 Cheni bahuiireni loj rebejnğa, bijreni diidx xhi räjp rexangl Dios lojreni xcuent bäze'ga.

18 Niluxh guiraa reni biejn diajg rediidxre bidxeloduxhreni xtidx rebaxtoorga.

19 Niluxh Marii gulucheeni guiraa rediidx ni biejn diajgni neṅ lastooni, rujntisni xhigab xcuent rediidxga.

20 Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

21 Che gudejd xhujṅ dxej, huinäreni bäze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bäzga.

22 Che basa' redxej ni gac naya te nan si'cni gunibee toMoisés loj xquijtzni, huinäjreni bäze'ga guedx Jerusalén, neṅ guidoro gunabreni gacnäj Diosni par tejpas.

23 Bejnreni scree sa'csi caj lo guijtz xten Dios: “Guiraa rexingangaloo xten bejṅ guilia'tu lo sa'reni te gunreni xtzunä”, räjp Dios.

24 Bidzujṅreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombäz.”

25 Neṅ redxejga, neṅ guedx Jerusalén rbäjz te dade' ni laa Simeón. Najcni te beṅsacduxh, ranṅduxhni Dios, cabäjzni jiääd te bejṅ ni gusläa rexpejṅ Israel. Rbäjz Sprit Dxaan xten Dios neṅ lastoo Simeón.

26 Sprit Dxaan abejṅ gacbeeni dini guet ansde fiini loj Crist ni guxhaḷ Dios.

27 Dxejcti räjp Sprit Dxaan xten Dios lojni chääni guidoro. Laḷni yu'ni neṅ guidoo, bidzujṅ José

con Marii, biädnäreni báz Jesús, te gunnäjreni Jesús nani rnibee xtidx Dios gunreni.

²⁸ Dxejc gudääz Simeón bāze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yälrbexilajz, sa'csi abasooblu nani bia'n diidx gunnäjlu xmoslu.

³⁰ Sa'csi abahuiloä nani siädgus_laa nuurnu neñ dojl,

³¹ ni abasujlu nez loj guiraa rebeñ guedxliuj.

³² Laani najc bianij ni susanij loj rebejñ ni di gac xpejñ Israel,

nājza nani gac xpala'n rexpejñlu guedx Israel, lajdxlu.

³³ Bidxeloj José nājza xnan Jesús rediidx ni canii Simeón xcuent bāze'ga.

³⁴ Dxejc benle' Simeón yejcreni, dxejc räjpni lo Marii xnan Jesús:

—Bahuii gan; bāze're biääd te loj rexpejñ Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejñ,

³⁵ te si'c jienloj xhi xhigab rujn cade tej rexpejñ Israel neñ lastooreni. Dxejcti par luj sajcn_i asdoo chääz te spaad lastoolu, sa'csi gac-huinuxh lastoolu.

³⁶ Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famil_i xten Aser. Anajcni beñgolduxh. Bachñaani che najcni dxaphuin, luxh gajdztis ijz gulāznājni chäälni che bia'nni biuud.

³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n nājza yälrbex-rniab lo Dios.

³⁸ Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

Che gubi'reni guedx Nazare't

³⁹ Che gulujx bejn xcuzejn guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni.

⁴⁰ Gunís biuxe'ga, guc nadaanni, guc nasinruzani sa'csi cayacnäj Diosni.

Che biu' Jesús guidoro

⁴¹ Casob ijz rij rexcezajn Jesús guedx Jerusalén te rinäreni te gojn xten lanij pascw.

⁴² Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga.

⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni.

⁴⁴ Bejnreni xhigab pet siädsanäjni rebeṣa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni,

⁴⁵ direni nidxälni. Dxejc gubisacreni guedx Jerusalén te huitilrenini ro'c.

⁴⁶ Chon dxej gudiilrenini dxejc bidxälrenini nen guidoro, sobga'ni nez galäi rebejn ni najn lei, cacuadiajgni xtiidxreni, cayujnzani yälgunabdiidx lojreni.

⁴⁷ Luxh guiraareni cacuadiajg xtiidxni, cadxeloduxhreni yäl najn xtenni, näjza rediidx ni cagudzu'ni lojreni.

48 Che bahuii rexcozajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xta_ldu cayunduxhnu xhigab caguuilnu luj nezree, nezre'c.

49 Dxejcti räjp Jesús lojreni:

—¿Xhicuent caguilltu narä? ¿La ditu gan riäj_l gunä xtzun Xta_{dä}, ä?

50 Luxh laareni direni niacbee rediidx ni guniini lojreni.

51 Dxejcti gubinäj_nireni guedx Nazare't, sanuuni rusoobni xtiidxreni. Luxh Marii guluchee_tisni guiraa recosre ne_n lastooni.

52 Duurtis gunís Jesús, caroobruza xcäl_najnni. Sanälajz Diosni, sanälajza guiraa rebej_nni.

3

Yäl_rusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

1 Nen redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia.

2 Lagajc ne_n redxejga Anás näjza Caifás najc rebixhojzro xten guidoro guedx Jerusalén. Ne_n redxejga biääd xti_dx Dios lo Juan, xi'n Zacaríi cheni rbäjz_ni nez lo reyubijdz.

3 Ni'c cuanzaj Juan guideb nez reyuj xten gueu Jordán, ro'c basule'ni xcuent yäl_rusiech_lajz, yäl_robnis ni nanab gunreni te gudzucaj Dios xtoj_lreni.

⁴ Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Coļyunsä'c xnezyuj Dad, coļslii rexnezyulajzni.”

⁵ Guiraa cadre sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, sacsä'creni.

⁶ Dxejcti guiralii bejn suhüi loj nani guxhal Dios.

⁷ Che bahüi Juan siäd xhidalduxh bejn te guirobnisreni, räjpni lojreni:

—¡La'tu benguidx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä?

⁸ Coļguchaa xmoodtu te si'c fii bejn guliini abasiechlajztu. Na'c cuentis rniitu lagajc nen lastootu “Abram najc xtadnu”, sa'csi narä rniä lojtu, sajx xca' Dios reguijre te con laareni guncheeni bejn gac rexagdo toAbram.

⁹ Aguibyajg naga' cuä' xlobaa reyajg; ni'cni guiraa reyajg nani di ninexhsä'c xcaj lojni, sidinreni te checreni.

¹⁰ Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹ Dxejc badzu' Juan diidxre räjpni:

—Ni rajp tio'p xhajibni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

¹² Näjza gaii bejn nani rusquijx xcuent reimpuet bidzujn lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejn maazdi ni nungäjl quixreni.

14 Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

15 Cadxeloj rebejn, cayujnreni xhigabduxh, naareni, “pet Juan najc Crist ni jääd.”

16 Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcro loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neñ lastootu näjza con guiboo, sa'csi rajpruni yälrnibee loä.

17 Aca'ni pal te gusiani triuu te cuääni triusa'c lo guijxh te cucheeni triuu neñ ngodx xtenni, dxejcti reguixhtriuuga suze'cnini lo bajl ni rejc par tejpas.

18 Rediidxre näjza xhidajl yälrulijdx gunii Juan te basule'ni redidxcoob loj rebejn.

19 Näjza lo Herodes ni najc gobernador basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini.

20 Di Herodes niu xtidx Juan, alga bejnini stee dojl, basälni Juan neñ latzguiib.

Che gurobnis Jesús
(Mt. 3:13-17; Mr. 1:9-11)

21 Che batiobnis Juan rebejn, nájza Jesús birob-nis. Cheni cabedx-canabni lo Dios, bixal xh-aguibaa,

22 dxejc biäjt Sprit Dxa xten Dios si'c te palom, bidzujnni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

23 Yu' Jesús galbitzoo ijz che gusloj cayujnni dzuun ni badeed Dios gunni. Rchalo rebejn najcni xi'n José, xi'n Elí.

24 Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José.

25 José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai.

26 Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá.

27 Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri.

28 Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er.

29 Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat.

³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim.

³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán.

³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón.

³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá.

³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor.

³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala.

³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec.

³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán.

³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj beŋdxab loj Jesús
(Mt. 4:1-11; Mr. 1:12-13)

¹ Jesús, sa'csi rbäjz Sprit Dxaŋ xten Dios lastooni, biunejzni gueu Jordán, dxejc huiŋä Sprit Dxaŋ xten Diosni lo reyubijdz.

² Ro'c bia'nⁿⁱ tiuu gubijdx, tiuu guxhijⁿ. Ro'c bidzujⁿ beⁿdxab ni rnibee te rlajzni gunni gusoob Jesús xtiid^xni. Luxh calaan Jesús, sa'csi gajdni gau guiraa neⁿ redxejga.

³ Dxejc räjp beⁿdxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diid^x lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajⁿ bejn, näjza guiraa diid^x nani rnii Dios sujⁿ guibajⁿ bejn.”

⁵ Dxejcti huinä beⁿdxab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj.

⁶ Dxejc räjp beⁿdxab lojni:

—Narä sunid^{xä} guiraa yälⁿribee näjza reyälⁿasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä.

⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diid^x, räjpni lojni:

—Acaj loj xquijtz Dios: “Dad Xtiostislu gan^{lu}, luxh lojtisni chulu gunlu dzuun.”

⁹ Dxejcti huinä beⁿdxabni lo guedx Jerusalén, huinäⁿini jiaa yejc xques guidoro. Dxejc räjp beⁿdxab lojni:

—Palga guliilu najclu Xi'n Dios, gutiäjs lo yuj

¹⁰ sa'csi si'c caj loj rexquijtz Dios:

Suxhal^l Dios rexanglⁿⁱ te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diid^x lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux beñdxab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujn stee dxej te gusacsíruni Jesús.

Gusloj Jesús cayujn xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpní yälrnibee xten Sprit Dxián. Bire'ch diidx xcuentni guiraa neñ reguejdx ni tre' nejzga.

¹⁵ Ruluiini neñ reguidobáz luxh guiraa rebejn rliä'p xpala'nni.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni neñ guidobáz sigajc ni rujnpacni, dxejc huisuliini te bilni

¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxälni cadro rnii scree:

¹⁸ Sprit Dxián xten Dios suganáj narä, sa'csi agule Dios narä te gusule'ä xtidxcoobni lo rebeñproob.

Baxhalni narä te gusiácä lastoo renani di lastooreni cuedxi,

te gusule'ä yälrusläa lo rebejn ni yu' lo dojl,

te gusiácä baloj rebeñ lotiä'p, te guslää rebeñ ni cadejd trabajw,

¹⁹ te gusule'ä abiu' ijzsa'c che rulaslajz Dios rebejn.

20 Dxejc basäu Jesús reguijtzga, badeednini loj bejn ni cayacnäj neñ guidooga, dxejc gurejni. Sa'csi guiraa rebejn ni sobga' neñ guidooga cahuidzu'tzreni lojni,

21 gusloj guniini, räjpni lojreni:

—Lagajc nadxej guzojb rediidx ni caj lo reguijtzre nez loj guiraatu.

22 Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

23 Dxejc räjp Jesús lojreni:

—Siniipactu rediidxre loä: “Doctoor, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadre najc lajdxlu.”

24 Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di rebeñ lajdxreni jiu xtiidxni.

25 Luxh rniliä lojtu, che gubajn Elías lo guedxliuj, guyu' xhidajl gunabiuud guedx Israel che di nisguij niajb choñ ijz garol, dxejc guyu' yälrianduxh guideb guejdxga.

26 Luxh di Dios nuxhaļ Elías rolijz nicla tej regunabiuud ni guläjz guedx Israel, alga baxhaļnini lo beñzajt, rolijz te gunabiuud ni rbäjz Sarepta, gajxh guedx Sidón.

27 Sigajcza che gubajn Eliseo lo guedxliuj, guyu' xhidajl beñ racxhuu ni raļ tiejxhreni guedx Israel, luxh dini nusiajc nicla tejreni, alga basiajcni dade' ni laa Naamán, ni siäd te guedxzajt ni laa Siria.

28 Che biejn diajg reni sobga' neṅ guidoo rextidx Jesús, bidxecheduxhreni,

29 huisuliireni, guläärenini neṅ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlanjreni nustejbrenini.

30 Dxejc Jesús sigaj gudejdn galäiireni, sä'tini ste'ca lajt.

Gulää Jesús beṅdxab lastoo te dade'

(Mr. 1:21-28)

31 Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel.

32 Bidxeloduxhreni xtiidxn sa'csi rusule'ni si'c te beṅnaj, si'c te ni rnibee.

33 Neṅ guidooga suga' te dade' ni rbäjz te beṅdxab neṅ lastooni. Guredxa'ni

34 räjpni:

—¡Aii! ¡Basaan nurru! ¿Xhicuent riädchu'lu loonu Jesús ni siäd Nasare't? ¿La siädlu te gunitlojlu nuurnu, ä? Narä numbeälu, nanä najclu Xin Dxa Dios.

35 Gudidxa' Jesús lo beṅdxabga, räjpni lojni:

—Basäu ro'lu, birii lastoo niguiire.

Dxejcti beṅdxabre basäl niguiiga lo yuj nez loj guiraareni, dxejc biriini neṅ lastoo dade'ga, per xhet bejndini dade'ga.

36 Bidxeloduxh rebejnğa, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeṅdxab con yälrnibee, luxh rusoob rebeṅdxab xtiidxn, riireni lastoo bejn.

37 Dxejc gusäab xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr
(Mt. 8:14-15; Mr. 1:29-31)

³⁸ Birii Jesús guidobáz, huijni roliz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrene lojni te gusiajcnini.

³⁹ Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujnni mandaad, cahuiinireni.

Rusiajc Jesús xhidajl yälracxhuu
(Mt. 8:16-17; Mr. 1:32-34)

⁴⁰ La_l ni cayääz gubijdx, guiraa reni rajp be_nracxhuu ni rajc garen garen yälracxhuu biädnäreni rebejn_ga lo Jesús. Dxejc laani batzuubni naani yejc te_gareni, dxejc biajc rebe_nracxhuuga.

⁴¹ Loj rebe_nracxhuuga, yu'reni birii rebe_ndxab ne_n lastooreni, rbedxa'reni räjpreni:

—Luj najclu Xi'n Dios.

Luxh Jesús gudil_näj_ni rebe_ndxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios
(Mr. 1:35-39)

⁴² Che bianij, biriini lo guejdx, huijni te lajt cadre rut rbäjzdi. Niluxh gudiil rebejn_ni, dxejc bidzuj_nreni cadre suga'ni. Rlajzreni nuscuääzrenini te di nuiini.

⁴³ Dxejc Jesús räjp lojreni:

—Nanab cha'a chasule'ä rextidx xcuent xcäl_rnibee Dios xhidajlr_uza guejdx, ni'cni baxha_lpac Dios narä.

44 Dxejc si'ctis cuanzaj Jesús basule'ni xtidx Dios neṅ guiraa reguidobáz neṅ reguejdx xten Galilee.

5

Che gunaazreni xhidajl bājł (Mt. 4:18-22; Mr. 1:16-20)

¹ Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios.

² Dxejc bahuii Jesús tio'p barcw ni suga' ro' nisga, rud yu'di neṅreni sa'csi rebejn ni rniaaz bājł abiriireni neṅ rebarcw te caguiibreni xquijxhreni ro' nisga.

³ Dxejc biu' Jesús neṅ te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús neṅ barcwga, ro'cli guslojni caguluiini rebejn.

⁴ Che gulujx xtiidxni, räjpni loj Simón:

—Huinä barcw cadro jiättru, colcuaa xquijxhtu lo nis te guiniaaztu bājł.

⁵ Räjp Simón lojni:

—Mastr, guideb yääl biennu dzuun, luxh dinu niniaaz nicla tej bājł, niluxh naj agunibeelu gusälsacnu guijxh lo nis.

⁶ Cheni basälreni xquijxhreni lo nis, gunaazreni xhidalduxh bājł, dxejc guslojli caräjs xquijxhreni.

⁷ Dxejc bejnreni seen loj resa'reni ni yu' neṅ stee barcwga te jiädycnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni neṅ nis.

⁸ Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te beṅdojl.

9 Si'c gunii Simón sa'csi bidxejb laani nájza guiraa rebejn ni yunäjni sa'csi gunaazreni xhidalduxh bäjł.

10 Nájza Jacob nájza Juan, rexi'n Zebedeo, ni runnäj Simón dzuun, nájzareni bidxejbreni. Per Jesús räjp lo Simón:

—Na'c guidxejblu, najli guisloj cueedxlu bejn lacuaa ni guiniaazlu bäjł.

11 Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

Basiajc Jesús te bejn ni ral tiejxhni

(Mt. 8:1-4; Mr. 1:40-45)

12 Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

13 Dxejc batzuub Jesús naani yejcni räjpni lojni:

—Rlazä jiajclu. Susiacälu.

Che guniini rediidxre, biacgajc bejn racxhuuga.

14 Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

15 Luxh xpala'n Jesús sanuutis cayä'pruni, guixeguixee care'ch diidx xcuentni. Rdojpza xhidalduxh bejn te gucuadiajgreni xtidx Jesús nájza te gusiajcni yälracxhuu xtenreni.

16 Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

17 Te dxej la_lni caguluiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siäädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rlui_loj suganäj xcäl_rnibee Dios Jesús te rajc russiajcn_i rebe_nracxhuu.

18 Dxejc bidzuj_n gaii dade' nuureni lo te lonbäz te bejn ni di gacdi guiniib, rlajzreni gusiu'renini nen_n yu' te quixhrenini nez loj Jesús.

19 Niluxh direni nidxäl canejz niu'reni sa'csi nadädu_xh ro'c sa'csi tre' xhidaj_l rebejn. Dxejc huäpnäjrenini yejc yu'ga, badzucajreni gaii tej, dx-
ejc basajbreni xloon be_nracxhuuga yejcli yu'ga te gujc bidzuj_nni nez loj Jesús.

20 Che bahuii Jesús yäl_rirililajz xtenreni, räjpni loj be_nracxhuuga:

—Dade', agubicaj xtoj_llu.

21 Dxejc rebejn ni ruluii leii näjza refarisee gus-
loj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtoj_l rebejn, Diostis rudzucaj dojl.”

22 Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c nen_n lastootu?

23 ¿Xhini'c najc guyasiru guiniini: “Agubicaj rex-
toj_llu”, o guiniini: “Huistie, guzaj”, ä?

24 Mbaj naj, suluiä nez lojtu Xi'n Dios ni gujc Xi'n Niguii räjp yäl_rnibee, yäl_nadip lo guedxliujre te gudzucajni xtoj_l rebejn.

Dxejc räjpni lo bejn_{ga} ni digacdi guiniib:

—Lojlu rniä, jhuistie, guläs xloonlu, huij rolijzlu!

²⁵ Lagajc dxejc nez lojreni huistiegajc bejn ni digacdi guiniib, guläsni xloonna cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhreni recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huisu Leví, basa'nni guiraa recosga, dxejc sanajlni Jesús.

²⁹ Dxejc bejn Leví te lanij rolijzni par Jesús. Biääd xhidajl bejn ni rusquijx xcuent impuest näjza sgaii bejn; sobganäjnireni lo mex.

³⁰ Dxejcti refarisee näjza rebejn ni ruluii leii guslojreni cayeinäjreni rexpejnpac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebendojl, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquineni te doctoor.

³² Dina niädtedxä rebeñsa'c, narä biädtedxä rebendojl te gusiechlajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

33 Dxejc gunabdiidx rebejn_{ga} loj Jesús, räjpreni:

—¿Xhicuent lacti rucua'n rexpejn Juan näjza rexpem refarisee, lacti rbedx-rniabreni loj Dios; niluxh rexpejn_{paclu} alga rajwreni, rä'reni?

34 Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' la_{ni} yunäjreni bi'n, ä?

35 Niluxh sidzuj_n dxej cheni sibicaj bi'n lojreni, dxejc sii sucua'nreni.

36 Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh.

37 Di gacdi gusäl_{ni} bincoob ne_n te guidbiejw sa'csi bincoobga sutiäsy_{a'}ni guidbiejwga dxejc sixe' binga, sixijnza guidbiejwga.

38 Ni'cni nanab gusäl_{ni} bincoob ne_n guidcoob si'c sigucheeza guiro'preni.

39 Luxh nicla tej bejn ni agu' bin ni yu' agujc xchej rlajz yä bincoob, sa'csi säjbni: “Bin ni yu' agujc xchej najc huenru.”

6

*Rutie' rexpejn Jesús triuu dxej nani rusilajzreni
(Mt. 12:1-8; Mr. 2:23-28)*

¹ Te dxej ni rusilajz rexpejn Israel sasaj Jesús näjza rexpejn_{pacni} nez loj reyuj cadre naga' triuu. Dxejc, sa'csi calaanreni gusloj caläädxreni doj lo triuu te cayajwrenini.

² Dxejc gunabdiidx gaii refarisee ni najc be_nguidoo, räjpreni lojreni:

—¿Xhicuent rujntu dzuun ni di nungäjl guntu che rajl dxej ni rusilajznu?

³ Dxejc räjp Jesús lojreni:

—¿La gajdtu goj loj reguijtz xhi bejn toDavid cheni calannäjni rebejn nani sanäni, ä?

⁴ Biu'ni neñ xquidoo Dios, gudajwni yätxtiil nani di nungäjl gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz ñaani

(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn Israel, biu'ni neñ te guidobáz, dxejc guslojni caguluini rebejn. Lagajc ro'c sobga' te dade' ni nabijdz ñaani ladbee.

⁷ Dxejc remastr xten leii näjza refarisee cagula'tzreni te don la susiajcní bejnğa dxej ni rusilajzreni, sa'csi caguiilreni xho gucuaquijreni Jesús.

⁸ Niluxh laani najnni xhi xhigab cayujnreni, dxejc guniini lo dade' ni nabijdz ñaani, räjpni:

—¡Huisulii! ¡Gudaa nez galäiire!

Dxejc huisulii bejnğa, gubigni lojni.

⁹ Dxejc räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcälñabajnni o la gudzucajnu yälñabajnni, ä?

¹⁰ Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz ñaani:

—¡Baslii ñaalu!

Dxejc bejn̄ni si'c, luxh biacgajc naani.

¹¹ Dxejc bidxechduxh rebejn̄ ni tre' ro'c, gusloj canabdiidxreni lo sa'reni xhi gunnājreni Jesús.

*Gule Jesús guitzubitio'p rexpejn̄pacni
(Mt. 10:1-4; Mr. 3:13-19)*

¹² Nen̄ redxejga, huij Jesús loj te dajn te huin- inājni Xtadni Dios. Ro'c gudejdni yāäl cabedx- canabni lo Dios.

¹³ Che bianij lo yuj, gurejdxni rexpejn̄ni. Ro'c guleni tzubitio'preni te gacreni xpejn̄pacni. Gulälajnireni reapost.

¹⁴ Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé;

¹⁵ Mateo; Tomás; Jacob xi'n Alfeo; Simón ni nagab loj rexpen̄ cananista;

¹⁶ Judas, bejtz Jacob; nājza Judas Iscariote ni guto' Jesús loj rebixhojz.

*Ruluii Jesús xhidajl bejn̄
(Mt. 4:23-25)*

¹⁷ Che biätñāj Jesúsreni yejc dajnga, guzudxireni yejc te danbāz sa'csi suga' xhidajl bejn̄ ro'c. Siädreni guiraa nez reguedx Judea, nājza guedx Jerusalén nājza reguejdx ni tre' gajxh nisdoo Tiro con Sidón. Rebejn̄ga bidzujn̄reni te gucuadiajgreni xtidx Jesús, te gusiajczanireni xcälracxhuureni.

¹⁸ Guiraa ni rdejdz trabajw yu' beñdxab nen̄ lastooreni nājza reni'c biajc.

¹⁹ Guiraa rebejn̄ rlajz caan Jesús, sa'csi rusiajcn̄i guiraareni con xcälrnibeeni.

*Baliidx Jesús rebejn̄
(Mt. 5:1-12)*

20 Dxejc bahuii Jesús loj rexpejn_upacni räjpni lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

21 'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjl Dios lajztu dxejcruxhijztu.

22 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguüi.

23 Colguibalajz nen redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsi retoxtadgoldooreni rebejn nani gunii xtidx Dios galoo.

24 'Probe'zatu, la'tu benrajp, sa'csi agojptu xcäl_unasa'ctu, xcäl_urbalajztu lo guedxliujre.

25 'Probe'tu nani rajp guiraloj xhixtentu naj, sa'csi sidejdtu yäl_urliaan.

'Proobzatu ni ruxhijztu naj, sa'csi sonduxhtu sidejdtu yäl_uhuinduxh, yäl_unalas.

26 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

*Chanälajzni rebejn nani rdxe'ch lojni
(Mt. 5:38-48; 7:12)*

27 Räjpzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu.

28 Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu.

29 Palga yu' chu rlanj quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza naj xcamangwlu xca'ni.

30 Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni.

31 Sigajc ni rlanjzlu gunnaj bejn la'tu, si'cza la'tu colyennaj bejn.

32 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebejdojl.

33 Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nejn dojl.

34 Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebejdojl rudedlaazareni loj rebejn ni najnreni siguixsac ni nasääbreni.

35 La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, najza loj rebejdojl.

36 Colgulaslajz resa'tu si'c rulaslajz Xtadnu Dios guiraa rebejn.

Colgulaslajz sa'tu

(Mt. 7:1-5)

37 Räjpzani:

—Na'c guntu yäl_guxhtis nani rujn bejn, naatu xhet laadi rujnni; te na'cza gun Dios yäl_guxhtis rextojl_tu. Na'c gucuaquijtu bejn te sigajcza di Dios gucuaquij la'tu. Col_gusiäj_l-lajz dojl ni rujn sa'tu, te si'cza gusiäj_l-lajz Dios rextojl_tu.

³⁸ Col_gudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' neñni, cupe'tlini gusäl_reni neñ xpolstu. Dios suniidx lojtu lagajc con mediid ni rudeedtu loj rebejn.

³⁹ Guniiza Jesús stee cuent räjpni:

—¿La sajc guluii te beñ lotiä'p nez yuj lo stee beñ lotiä'p, ä? ¿La di guiro'preni guitejb nen te gueed, ä?

⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcn si'cni najc mastr xtenni.

⁴¹ ¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu?

⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¡Beñguijdx! Guläxгаа yagro ni yu' balojlu, dxejc sajc fisa'clu te cuääl_u guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg (Mt. 7:17-20; 12:34-35)

⁴³ Räjzpni:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c.

⁴⁴ Sa'csi tebgaj reyajg rusen_lojni xhi yajgni xcuent ninejxh ni rcaj lojni. Di bejn gutie' iigw

lo reyaguejch, diza bejn gutiu' uub lo te yag bal-agrejn.

⁴⁵ Rebeṅsa'c rnii didxsa'c, sa'csi xhigabsa'c yu' neṅ lastooni. Niluxh rebeṅguijdx rnii ganax didxguijdx sa'csi xhigabguijdx yu' neṅ lastooni, sa'csi ro'ni rnii nani yu' neṅ lastooni.

Tio'p bejn ni benchee tio'p yu'

(Mt. 7:24-27)

⁴⁶ Räj pzani:

—¿Xhicuent rniitu loä: “Dad, Dad,” luxh ditu gun nani rniä guntu?

⁴⁷ Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä.

⁴⁸ Najcni si'c te bejn ni benchee rolijzni, ganid gudäänni jiät, dxejcti bejn ni cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzut'z yejc te guilaj.

⁴⁹ Niluxh reni rcuadiajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujn cimient xten yu'ga. Dxejcti biäjt nisro, bidijn ni cuä' yu'ga, dxejc li gurebä'n yu'ga, gunitlojtini.

7

Basiajc Jesús xmos te beṅ roman ni rnibee

(Mt. 8:5-13)

¹ Che gulujx gunii Jesús loj rebejn, huijni te guejdx ni laa Capernaum.

² Ro'c yu' te beṅ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni.

³ Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajnereni Jesús jiädni te gusiajcní xmos dade'ga.

⁴ Che gubigreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäjl gacnäjluni

⁵ sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siäddzungajxhreni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi.

⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacajcni.

⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcnini.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädnejlni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolijz capitán, bahuiireni abiajc xmosni.

Baspañsac Jesús xi'n te gunabiuud

¹¹ Neñ redxejga, huij Jesús te guejdx ni laa Naín. Huinäni rexpejn pacni näjza xhidajl bejn ni sanajlni.

12 Che bidzuj_nni gajxh ro' guejdxga, bahuiini sacua'tzreni te be_ngut, te bi'n ni najc xtebtis xi'n te gunabiuud. Xhidalduxh be_n loj sacua'tzni.

13 Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

14 Dxejc gubig Jesús lo rebej_n ni sanä be_ngutga, dxejc guzudxi reni nuu be_ngutga. Dxejc räjp Jesús loj be_ngutga:

—¡Bi'n!, narä rniä lojlu; ¡Huistie!

15 Dxejc huistie be_ngutga, sobga'ni guslojni caniini. Dxejc badeed Jesúsni lo xnanni.

16 Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzuj_n nez loonu.

Caniizareni:

—Lagajc Guejb Dios abiädhuui rexpej_nni.

17 Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

*Xpej_n Juan ni rutiobnis huinabdiidx loj Jesús
(Mt. 11:2-19)*

18 Rexpej_npac Juan ni rutiobnis bij rediidxga lojni che yu'ni latzguiib.

19 Dxejc baxha_lni gaiireni lo Jesús te sanabdiidxreni: “¿La guliipac najclu Crist ni jiäd o sibäjznu chu stee be_n, ä?”

20 Dxejcti gubig rexpej_n Juan loj Jesús, räjpreni:

—Juan ni rutiobnis baxha_l nuurnu te guiniabdiidxnu lojlu: “¿La luj najc Crist ni jiäd o la sibäjznu chu stee be_n?”

21 Lagajc dxejc che bidzujnreni, basiajc Jesús xhidajl bejn ni rajc garen-garen yälgujidx, ni yu'za rebenxab lastooreni, basiajczani baloj ni di fii.

22 Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebencoj rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; reben gut, agubansacreni; luxh loj rebenproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl.

23 Chicbaa nani rumbee narä, nani di cuälaz narä.”

24 Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä?

25 ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabaṅsa'c, rolijz reṅei yu'reni.

26 ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios.

27 Juan najc niguii ni ruzä't rexquijtz Dios cadro caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

28 Rniliäpac, loj guiraa rexingaan regunaa, nicla tejni gajd guiricaj ni najc te beṅsacduxhru nez loj Dios si'c najc Juan ni rutiobnis. Niluxh nani guxi-iru sajc lo xcälrnibee Dios ni jiääd, sajcruni loj Juan.

29 Che biejn diajg rebejn nájza reni rusquijx impuest rextiidxni xcuent Juan, gucbeereni rujn Dios yálguxhtissa'c, sa'csi abatiobnis Juanreni.

30 Niluxh refarisee nájza rebejn ni ruluii leii gulälazreni nani niujn Dios par laareni, sa'csi di-reni nicäjb nutiobnis Juanreni.

31 Räjpa Jesús lojreni:

—¿Xhocha guiniä najc rebejn nani tre' naj?

32 Najcreni si'c rebiuxbáz nani rguijt nez lo guii cadro rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.”

33 Sa'csi che biääd Juan, dini niauxha't, dizani niä' bin, luxh räjptu: “Yu' bendxab lastooni.”

34 Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahuilaaare, dade're rauxha't, rä'zani, najcni xamiigw rebendojł nájza rebejn ni rusquijx reimpuest xten gubier.”

35 Ni'cni xcälhajn Dios huenliisi rienloj loj dzuun ni rujn rebejn ni najn.

Jesús huij rolizj Simón ni najc farisee

36 Dxejc tej refarisee gunii loj Jesús, räjpnii:

—Jiäädlu rolizä te guidaunu.

Dxejc huij Jesús rolizjni, ro'c gurejni lo mex.

37 Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni.

38 Che biu' gunaaga, bidzujjni lo ni' Jesús, gus-lojni cayoوني. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús.

39 Che bahuii farisee ni gurejdx Jesús rolijzni, recosre, bejnii xhigab: “Palga gunii najc nigui-ire Xi'n Dios, sacbeeni chu najc nájza xho najc gunaare ni cagajn ni'ni, sacbeezani najcni te gunadolduxh.”

40 Dxejc gunii Jesús loj fariseega, rájpnii:

—Simón, yu' xhi rlazä guiniä lojlu.

Dxejc rájp fariseega lojni:

—Guniini, Dad maestr.

41 Dxejc rájp Jesús lojni:

—Tio'p bejn nazääb meel lo te bejn ni rudedlaa meel. Tej reni nazääb si'cti gaiigayuu meel. Steeni nazääb si'cti tiubitzuu meel.

42 Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

43 Badzu' Simón diidxre lojni, rájpnii:

—Rchaloä bejn ni nazääbru lojni.

Dxejc rájp Jesús:

—Laaca rniilu.

44 Dxejc gubiré Jesús, bahuiini loj gunaaga. Dxejc rájpnii loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcnii.

45 Dilu nuchagro' narä, luxh laani cheli biu'ä ree, gajdni cuääz guchagro'ni ni'ä.

46 Dilu nusäl se't yecä, niluxh laani basälni se't ni rlianexhduxh ni'ä.

47 Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni

rudzucaj Dios guxii xtojłreni, guxiiza sanälajzreni Dios.

⁴⁸ Dxejcti räjpni loj gunaaga:

—Agubicaj rextojłlu.

⁴⁹ Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojł bejn, ä?

⁵⁰ Räjp Jesús loj gunaaga:

—Agulaalu lo xtojłlu sa'csi ahuililajzlu; huij naj, bascuedx i lajzlu.

8

Regunaa ni gucnäj Jesús

¹ Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpajn pacni

² näjza gaii gunaa ni abasiajcn i, agulääni reben dxab lastooreni, näjza basiajcn i xcälguijdxreni. Tejni laa Marii ni laaza Magdalen, ni gulää Jesús gajdz ben dxab nen lastooni.

³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquineni.

Xcuent bejn ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidajł bejn lojni ni birii xhidajł reguejdx. Lojreni gunii Jesús con te cuent ni ruluii, räjpni:

⁵ —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini.

⁶ Yu'za lajt bitejb binijga neñ reguij cadre xheti xhidajl yuj. Che gulejn binijga, gubidzgajcni sa'csi xheti xcojp ro'c.

⁷ Yu'za lajt bitejbni nez neñ reyaguejch. Che gulejni, di reyaguejch nusaan niroob gäjlgä.

⁸ Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajç gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejn pacni lojni räjpreni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yälñajn te gacheetu reyälxhiga'tz xten xcälñibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gachesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Räjpzani:

—Scree säloj cuentre, rebinij najc si'c xtidx Dios.

¹² Binij ni biajb lo nezyuj najc si'c rebejn ni rucuardiajg xtidx Dios. Dxejc riääd beñdxab,

riäddzucajni rediidxga lastooreni te na'c chalilajzreni xtidx Dios, te na'cza laareni lo dojl.

¹³ Binij ni biajb neñ reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios.

¹⁴ Binij ni biajb neñ reyaguejch najc si'c rebejn ni rucuadiajg xtidx Dios, per lañ ni sanuureni xnejzreni, rijia'nreni lo recos guedxliuj, lo yälñasa'c ni ruhuiireni, näjza rujnreni si'ctis ni rlajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios.

¹⁵ Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yälñasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas

(Mr. 4:21-25)

¹⁶ Räjpzani:

—Ruti te bejn ni rucuaguij te bajl dxejc rusäuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga.

¹⁷ Xhet yu'di ni yuchetzu'tzdi ni di guidzujñ dxej guiluiini; xhet yu'diza ni naga'tz naj ni di guidzujñ dxej gacbee bejnñi.

¹⁸ Ni'cni colcuadiagsa'c diidx; sa'csi guiraa rebejn ni rajp yälñracbee, sajprureni yälñajn. Luxh reni di

ninuu nucuadiajg xtidx Dios, lojni sibicaj näj ni abacuadiajgni, ni rchaloni najnni.

Xnan Jesús con rebejtni

(Mt. 12:46-50; Mr. 3:31-35)

¹⁹ Dxejc bidzujn xnan Jesús näjza rebejtni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c.

²⁰ Dxejcti huisa'n te bejn diidx loj Jesús, räjpni:

—Xnan guejblu näjza rebejtz guejblu suga' rolä', luxh rlajzreni fiireni lo guejblu.

²¹ Badzu' Jesús diidxre lojreni, räjpni:

—Xnanä näjza rebetzä najc rebejn ni rucuadiajg, ni ruzoobza xtidx Dios.

Basiacdxi Jesús te beduxh

(Mt. 8:23-27; Mr. 4:35-41)

²² Te dxej biu' Jesús näjza rexpejn pacni nen te barcw. Dxejc räjpni lojreni:

—Coļcho' stelaad ro' nisre.

Basyu'reni barcw lo nis, sä'tireni.

²³ Cheni sadejdreni galäii nisga, gudiejs Jesús nen barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis nen barcw, ameerli jiäaz barcwga lo nis.

²⁴ Dxejcti huicuäänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajnni, huistieni, dxejc gudidxa'ni lo bejga näjza lo nis ni cayäsjaaa. Dxejc guläjz bejga, guredxiza nisga.

²⁵ Dxejc räjpni lojreni:

—¿Con xcälrlililajztu, ä?

Per laareni bidxebreni, bidxeloduxhreni, can-abdiidxreni lo sa'reni:

—¿Chuni'c najc niguiire te rnibeeni bej nájza nis, luxh rusobdiajg bej nájza nis xtiidxni?

Te beñ Gadara ni guyu' rexsprit beñdxab lastooni (Mt. 8:28-34; Mr. 5:1-20)

²⁶ Bidzujntireni lo yuj xten Gadara ni tre' stelaad ro' nis nez loj reyuj xten Galilee.

²⁷ Cheni biäjť Jesús neñ barcw baläjni lo yuj, gubig te bejñ ni siäd guejdxga lojni. Agujc xchej yu' rebeñdxab neñ lastooni. Dini gacw xhajbni, dizani cuäáz neñ yu', alga rbäjzni cadro yu' rebaa.

²⁸ Che bahuini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebeñdxabga neñ lastoo bejñre. Agujc xchero cazob rniaaz rebeñdxabga bejñga ruliib rebejñ ni'ni, ñaani con cadeñguiib te guilibdzu'tzni, te xhet gundini bejñ. Niluxh laani rutiugya'ni recadeñ, dxejc rebeñdxabga rinärenini nez lo reyubijdz.

³⁰ Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebeñdxab ni yu' neñ lastooni.

³¹ Dxejc gunabduxhrene loj Jesús na'c guxhalsacnireni cadro biriireni.

³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebeñdxabga loj Jesús te gusaanni jiu'reni neñ recuchga. Che cuäjb Jesús,

³³ birii rebeñdxabga neñ lastoo dade'ga, biugajczeni neñ recuchga. Che biu'reni neñ recuch, baxun recuchga bitejbreni ro' te bala', ðxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nreni diidx lo rebeñguejdxga näjza lo reben rench.

³⁵ Dxejc biädhuii rebejn xhini'c gujc ro'c. Che bidzujnreni cadre suga' Jesús, bahuiireni loj bejn ni birii beñdxab lastooni. Sobga'ni cuä' ni' Jesús, najcwni xhajbni, luxh xhetru rajcni yejcn; dxejc bidxebduxh rebejn ga.

³⁶ Sas reni bahuiloj xho gujcn, bijreni diidx xho basajc Jesús bejn ni guyu' rebeñdxabre lastooni.

³⁷ Dxejc guiraa reben Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhreni. Ni'cni biu' Jesús neñ barcw te gubisacni nejz cadre siädni.

³⁸ Dade' ni birii rebeñdxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹ —Gubi' rolizjzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo näjza te gunaa ni gudajn xhajb Jesús

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni.

⁴¹ Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolizni

⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lałsi sää Jesús rolizni, birinajl xhidalduxh bejnni, catäälirenini.

⁴³ Loj rebejnga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed.

⁴⁴ Gubig gunaaga dejtz Jesús te gudajnni ro' xhajibni. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

⁴⁷ Che gucbee gunaaga anajn Jesús gudajnni xhajibni, bidxejbni, racejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajibni näjza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

49 La₁ni canii Jesús si'c bidzuj_n te bejn ni siääd rolijz Jairo, ni rnibee te guidobäz. Räj_pni loj Jairo:

—Agujt xindxa'plu. Na'cru gutajllu xtzuun Dad Mastr.

50 Che biejn diajg Jesús rediidxga, räj_pni loj Jairo:

—Na'c guidxejblu. Huililajztis te jiac xindxa'plu.

51 Che bidzuj_nreni rolijzni, xtebtis Pedr, Jacob, Juan näjza xcuzaj_n dxape'ga biunäj_n nen_n yu'ga. Peta rebejn_n ni siäd_naj_nni bia'nreni rolä'.

52 Cayonduxh guiraa rebejn_n ni sobga' nen_n yu'. Dxejc Jesús räj_p lojreni:

—Na'c roontu, gajd dxape're guet, nagayejtisni.

53 Alga baxhiz_näjrenini, sa'csi anaj_nreni agujt dxape'ga.

54 Dxejcti gunaaz Jesús _naa dxape'ga, dip guniini, räj_pni lojni:

—¡Dxape', huistie!

55 Dxejc guba_nsac dxape'ga, huistiegajcni. Dxejc gunibee Jesús gudeedreni xhi gauni.

56 Bidxeloduxh rexcuzaj_nni. Per gunibee Jesús na'c güireni diid_x xhini'c gujc ro'c.

9

Ruxhal Jesús guitzubitio'p rexpejn_pacni (Mt. 10:5-15; Mr. 6:7-13)

1 Batie' Jesús guitzubitio'p rexpejn_pacni te badeedni yäl_rnibee lojreni te cuääreni reben_dxab lastoo rebejn_n, näjza te gusiajcreni reben_racxhuu.

2 Baxha₁nireni te gusule'reni diid_x xcuent xcäl_rnibee Dios näjza te gusiajcreni reben_racxhuu.

3 Dxejc räj_pni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhabtu; tejtisni chanätu.

⁴ Chutis rolijz bejn cadre guidzujntu, ro'c coljia'n cheni guiriilitu lo guejdxga.

⁵ Palga direni gusaan jiu'tu rolijzreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

Xho gujt Juan ni rutiobnis

(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebenjut.

⁸ Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac.

⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlanjpac Herodes fii lojni.

Bayaan Jesús gaii mil bejn

(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejn pacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn, gajxh te guejdx ni laa Betsaida.

¹¹ Che gucbee rebejn caro sääreni, huinajlrenini bidxälrenini. Che siädreni lojni huichaglojnireni,

sas gusloj cagusule'ni lojreni xcuent xcäl_rnibee Dios. Basiajczani rebejn ni cayacxhuu.

12 Che gusloj cayäáz gubijdx, gubig rexpejn_pacni loj Jesús, räjpreni lojni:

—Gojs loj rebejn_re, agojl_jiireni te chatiilreni xhi gaureni, näjza cadre tedreni guxhijn lo rerench, neñ reguedxbáz, sa'csi ree xhet yu'di.

13 Dxejcti räjp Jesús loj rexpejn_pacni:

—¡La'tu col_gudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bälj. Ni'ctis yu' palga dinu chasiiru xhi gau reben_xhidajlre.

14 Luxh najc rebejn_ga si'cti gaii mi_l niguii. Dxejc räjp Jesús loj rexpejn_pacni:

—Col_jeitz lojreni cuereni xcua-xcuaareni, si'cti tiuubituzagajreni te cuaa.

15 Si'c bejnrenini, sas gurej guiraa rebejn_ga si'c.

16 Dxejc cua' Jesús gaii yätxtiilga näjza tio'p bäljga, guläsni lojni xhaguibaa, badeedni xquixtios lo Dios xcuent yäl_rajwga. Che gulujx badeedni xquixtios gula'ni reyätxtiilga näjza rebäljga, dx_ejc sanuutis badeednini loj rexpejn_pacni te gudis-renini loj rebejn_ga.

17 Guiraa reben_xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm_yätxtilbiujy näjza bälbiujy ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

18 Te dxej la_lni cabedx-canab Jesús lo Dios, xtebni näjza rexpejn_pacni, gunabdiidxn lojreni, räjpni:

—¿Chuni'c rnii rebejn nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubaṅsac.

²⁰ Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabääznu.

Jesús rnixgaa xho guetni

(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpni:

—Na'c gäbtu si'c lo rebejn.

²² Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibaṅsacä ni riojn dxej.

²³ Dxejc räjpni loj guiraareni:

—Palga chu tejtü rlaiz guirinajl narä, nanab jiällajzni xhixtenni, te guixe-guixee guntisni nani gudedä gunni.

²⁴ Sa'csi nani rlaiz guiniazdu'tzni xcälṅabajṅni, sunijtni yälṅabajṅ lo Dios; luxh nani runijt xcälṅabajṅni xcuent xtidxä, sica'ni yälṅabajṅ par tejpas.

²⁵ Sa'csi ¿xhi gaan gun te bejn palga xca'ni guideb guedxliuj, luxh gunijtni xcälṅabajṅni lo Dios?

²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäázani

cheni jiälä si'c reii guideb yälrdimbicha' xten Xtadä näjza rexanglni.

²⁷ Guliipac rniä lojtu, yu' gatii reni suga' ree, ni di guet, suhuixgaareni xcälrnibee Dios.

Bachaa xho rluiloj Jesús

(Mt. 17:1-8; Mr. 9:2-8)

²⁸ Gudejdti xhujñ dxej gunii Jesús diidxre, dx-
ejcru huinä Jesús Pedr näjza Jacoob näjza Juan,
huijreni jiaa yejc te dajn te guredx-gunabni loj
Dios.

²⁹ Lalni cabedx-canab Jesús lo Dios, bidxaa
xho ruluii lojni; dxejc xhajbni gujc nolbäj, rdim-
bicha'lini.

³⁰ Biricajza tio'p dade' caninäjrenini. Redade'ga
najc toMoisés näjza Elías.

³¹ Rdimbicha'za redade'ga. Caninäjreni Jesús
xcuent xho guetni guedx Jerusalén.

³² Luxh Pedr näjza resa'ni guyuduxh bacal lo-
jreni; che bire'ch bacal lojreni bahuiireni lo
yälrdimbicha' xten Jesús näjza loj guiro'p redade' ni
caninäjni.

³³ Cheni agojl jiunejz redade'ga loj Jesús, räjp
Pedr loj Jesús:

—Dad, Mastr, huenduxh suga'nu ree. Basaan
jiencheenu choñ yue', tejni par luj, tejni par
Moisés, steeni par Elías.

Luxh di Pedr gaan xhini'c caniini.

³⁴ Lalni caniini si'c, bire' te za gusloj cayäjt
yejcreni, dxejc bidxejbreni che biu'reni neñ zaga.

³⁵ Dxejcti biejn diajgreni neñ zaga te xse' te ni
gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuiireni sug-axteb Jesús. Dxejc niäutis ro'reni neñ redxejga, rut lojdi bijreni diidx xcuent ni bahuiireni ro'c.

Basiajc Jesús te biuux ni guyu' beñdxab lastooni
(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejn cabäz Jesús.

³⁸ Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä.

³⁹ Luxh beñdxab rniaazni, sas ruscuedxa'nini, rajcni si'c yälguidxbej, rbääni bitzun ro'ni, rusacsíduxhnini, luxh dini gusaanni.

⁴⁰ Agunabä loj rexpejnpaclu nibääreni beñdxabga, luxh di niajcdini.

⁴¹ Dxejc badzu' Jesús diidxre, räjpni:

—¡Bejn ni di chalilajz, beñguijdx! ¿Gucli chunäätu, gucli gunä huant la'tu? ¡Gudanä xi'nlu ree!

⁴² Dxejc che cabig biuuxga lojni, basälta' beñdxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj beñdxabga, basiacgajcni biuuxga, dxejc badeednini lo xtadni.

⁴³ Guiraa rebejn bidxeloduxh yälrnibeduxh xten Dios.

Rnii Jesús stehuält xho guetni
(Mt. 17:22-23; Mr. 9:30-32)

Lałni cadxeloj rebejn lo recos ni bejn Jesús, räjpni loj rexpejnpacni:

44 — Colcuadiajgsa'c rediidxre, na'cza jiällajztureni, sa'csi sutedreni narä Xi'n Dios ni gujc Niguii ladzṇaa rebejn.

45 Niluxh di rexpejn pacni niacbee xhi säloj rex-tiidxni, sa'csi Dios bacua'tznini lojreni te di ni-acbeerenini. Bidxejbzareni niniabdiidxreni loj Jesús xhi säloj rediidxga.

Chuni'c saj cru

(Mt. 18:1-5; Mr. 9:33-37)

46 Guslojza rexpejn Jesús canabdiidx lo sa'reni:
—¿Chuchani'c saj cru loonu?

47 Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni,

48 räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtaḁä ni baxhaḁ narä. Ni najc maazru nadolajz lojtu, ni'c najc ni saj cru.

Nani di guiniyaj nuurnu, xladnu yu'ni

(Mr. 9:38-40)

49 Dxejc räjp Juan loj Jesús:

—Mastr, bihuiinu loj te bejn ni rbää rexpenḁxab neṇ lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

50 Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacob näjza Juan

51 Che siäddzujṇ redxej ni chää Jesús xhaguibaa, bejn ni xhigab chää pacni guedx Jerusalén.

52 Baxhalni gail bejn gunijd lojni chääreni te guejdx xten Samaria te satilreni cadre jia'nreni ro'c.

53 Luxh rebejn samaritan di rlanjreni guded-laareni te lajt cadre jia'nreni, sa'csi najnreni chääreni guedx Jerusalén.

54 Che biejn diajg Jacob näj Juan, tio'p xpejn pacni, si'c, sas räjpreni loj Jesús:

—Dad, ¿La rlanjlu guinibeenu jiajt guiboo xh-aguibaali te guze'cni guiraa rebenguejdxga si'cni bejn Elías?

55 Dxejc bahui Jesús lojreni, gudidxa'ni lojreni, räjpni:

—Ditu gaan chuni'c rnibee lastootu.

56 Sa'csi narä Xi'n Dios ni gujc Niguii dina niälä te gudzucaä xcäl nabajñ rebejn. Narä biälä te guslääreni lo dojl.

Dxejcti huijreni garenca guejdx.

Reni rlanj nirinajl Jesús

(Mt. 8:19-22)

57 Lalni sääreni lo nezyuj, biääd te bejn gunii loj Jesús, räjpni:

—Dad, narä rlazä jiadnalä guejblu cadrotis chää guejblu.

58 Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääreni, niluxh narä Xi'n Dios ni gujc Niguii, dina gapä nicla te lajt cadre guscugä yecä.

59 Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxgaá xtadä, dxejcru jiädna_lä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl_rnibee Dios.

⁶¹ Dxejc räjp steeni lojni:

—Dad, rlazä jiädna_lälu, niluxh basanxgaa chasadixä resa'ä ni tre' rolizä.

⁶² Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl_rnibee Dios.

10

Ruxhal Jesús regayonbitzuu

¹ Che gulujx reni'c, gule Jesús gayon_nbitzuu bejn, baxha_nireni tio'pgajreni te basnijdnireni lojni loj reguejdx cadre nanab tedni.

² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxha_ni xhidajlru bejn ni gun dzuun gutie' xcose'chni.

³ Colchäj la'tu; colhuii xho ruxha_lä la'tu si'c xiil galäii recuyo't sa'csi sunnäjreni la'tu si'ctisni rla-jzreni.

⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz.

⁵ Cheni jiu'tu roliz te bejn, ganiddoo colye'tz: “Sucuedxilajz reni rbäjz ree.”

⁶ Palga najcni te bejn ni rdxagljajz yälrbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu.

⁷ Coljia'n lagajc rolijz bejn cadre guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäjł xca'ni xcuent dzuunga. Coljia'n tejtis lajt dxejtis ni chutu lo guejdxga.

⁸ Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu.

⁹ Colgusiajc rebenracxhuu ni yu' ro'c, colye'tz lojreni: “Abidzujngajxh xcälrnibee Dios.”

¹⁰ Palga jiu'tu te guejdx cadre di rlajzreni gucuadiajgreni xtiidxtu, colrii lo nezyuj, ro'c colye'tz lojreni:

¹¹ “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzujngajxh xcälrnibee Dios lojtu.”

¹² Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

*Reguejdx ni di niu xtidx Jesucrist
(Mt. 11:20-24)*

¹³ Räjzpani:

—¡Probe'tu bejn guedx Corazín! ¡Probe'zatu bejn guedx Betsaida! Paru nuhiii rebenzijt ni gubajñ guedx Tiro näjza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzarenı lo cobdäj si'c te seen abasiechla-jzreni.

¹⁴ Che gun Dios fis rextojł rebejn guedxliuj, guxi-iru gac xfis Dios lo rebenzijt ni gubajñ guedx Tiro

näjza Sidón. Fisroru gun Dios reguedx Corazín näjza Betsaida.

¹⁵ Luxh luj guedx Capernaum, rchalolu siäjslu xhaguibaa, alga siajblu gabijlli, cadro gaclu fisro xten Dios.

¹⁶ Rajpzani lo rexpejn pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhaḷ narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhaḷ Jesús, rbaduxh lajzreni, räjpreni:

—Dad, näjza rebenḍxab rusobdiajg xtiidxnu che rusä'tnu lajlu.

¹⁸ Räjp Jesús lojreni:

—O'n. Ni'cni narä bahuiä che gunijt xcälrnibee benḍxab, bitejbni xhaguibaa si'c bianij xten guzii.

¹⁹ Colgacbee. Narä runidxä yälrnibee lojtu te guläjtu yejc bäl näjza yejc naxejb; runidxäza yälrnibee te guntu gaan lo xcälrnibee benḍxab. Xhetliidi gun daan la'tu.

²⁰ Na'c guibalajztistu sa'csi rusobdiajg rebenḍxab xtiidxtu; colguibalajzru sa'csi acuj lajtu lo xquijt Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznäj Jesús Sprit Dxiän xten Dios, dxejc räjpni lo Dios:

—Rliä'pä xpala'nlu Xtadä ni rnibee xhaguibaa näjza guedxliuj, sa'csi bacua'tzlu xnezyujlu lo rebenḍ nanduxh, per baluuiu xnezyujlu loj rebejn ni

najc nadolajz si'c te biuxbäz. O'n, Xtradä, sa'csi si'c rlahzlu gunlu.

²² Guiraa recosre abaniidxlu loä Xtradä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtradä, xtebtis narä ni najc Xi'nlu, con rebejn ni rlazä gumbee luj.

²³ Dxejc bahuii Jesús loj rexpejn pacni, räjpni lojtisreni:

—Chicbaa la'tu näjza renani ruhuii guiraa nani cahuilojtu.

²⁴ Sa'csi rniliä lojtu, balti redade' ni gunii xtidx Dios galoo, baltiza rereii rlahz nuhuiireni guiraa ni cahuilojtu, niluxh direni nuhuiini. Rlahzreni niejn diajgreni rediidxre ni cayejn diajgtu, luxh di diajgreni niejnni.

Xcuent te beñhuen ni siääd Samaria

²⁵ Dxejc huisulii te maestr xten leii, huininäjni Jesús, rlahzni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibañnäá Dios par tejpas?

²⁶ Sas räjp Jesús lojni:

—¿Xhini'c caj lo guijtzt xten leii? ¿Xho rolluni?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälahzza resa'lu si'ctis ni sanälajzlu lagajc luj.

²⁸ Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yälñabajnre.

29 Per mastr xten leii, rlanjni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

30 Dxejc räjp Jesús lojni:

—Te beṅ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini.

31 Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

32 Gudejdza te levita, bejṅ ni rujnza dzuun neṅ guidoo. Che bidzujṅni cadro naga' bejṅga, gudejdni stelaad, sä'tini.

33 Dxejcti te beṅ Samaria, laṅni sääni biaj, gudejdni nezyujga, bidzujṅni cadro naga' bejṅga. Che bahuiini lojni, balaslajznini.

34 Gubigni loj bejṅga, basälṅni se't näjza bin loj bejṅ ni nadxälguijdx, dxejc batejbnini te la' lajd. Dxejc bascuijbnini dejtz lagajc xmanni, huinänini cadro rudedlaareni yu', ro'c cuanäjnini.

35 Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejṅre; palga gunijtrulu, siguixätini lojlu che guibi'ä.”

Sä'tini.

36 Dxejc räjp Jesús lo mastr xten leii:

—¿Chu tej lo guidxonṅ rebejṅga najc si'c sa' xten dade' ni biajb ladzṅaa gubaan?

37 Dxejc räjpni loj Jesús:

—Ni balaslajz bejṅga.

Dxejc räjp Jesús lojni:

—Huij te sigajcza chayejnlu.

Bidzujn Jesús roliz Mart näjza Marii

³⁸ La_lni huinuu xnezyujni, bidzuj_nni te guejdx. Ro'c bidxaagni te gunaa ni laa Mart ni huinänini rolizni.

³⁹ Yu' te bälj Mart ni laa Marii, luxh laani gurejni cuä' ni' Jesús te cacuadiajgni xtiidxni.

⁴⁰ Mart cagusquej_nni cayuj_nni xhi gaureni. Sas gubigni loj Jesús, räjpni lojni:

—¿La dilu jiu rusanxeb bälä narä te xtebä cayunä remandaad? ¡Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos,

⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11*Rului Jesús xho guiniabni lo Dios*

(Mt. 6:9-15; 7:7-11)

¹ Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpej_npacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpej_npacni.

² Dxejc räjp Jesús lojreni:

—Che cuedx-guiniabtu lo Dios, scree col_nni: Xtadnu ni yu' xhaguibaa,

suchä'p xpala'nlu, sujiääd xcäl_rnibeelu.

Sugac si'ctisni rlajzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni rquiinnuni.

⁴ Basiäj_l lajzlu redo_l xtenu si'cni riäj_l lajznu redo_l ni rujn rebej_n loonu.

Na'c gusaanlu jiajbnu lo xcälrnibee beñdxab.

Baslaa nuurnu lo dojl.

⁵ Dxejc räjpza Jesús lojreni:

—Paru tejtü yu' te xamiigwni, luxh guidzujñni rolizjni garol yääl, gäbni: “Xamigwä, banidxlaa choñ yätxtiil,

⁶ sa'csi bidzujñ te xamigwä rolizä ni bazaj biaj, luxh xhet ra'pädi te gudedä xhi gauni.”

⁷ Xhixh sinii ni naga' neñ xyu'ni, gäbni: “Na'c riädtie'chlu bacał loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.”

⁸ Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacałni.

⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu.

¹⁰ Sa'csi chutis ni rniab, rca'ni nani rniabni; chutis ni rguil xhi cos, rdxälñini; nani rusejz rolä', suxhalzarenı lojni.

¹¹ 'Paru tejtü ni najc dad, jiäd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäl, ¿la sudeedtu te bäl, ä?

¹² O palga guiniabni te tzutbejt, ¿la sudeedtu te naxejb, ä?

¹³ Palga la'tu, ni najc beñdojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

Rucuaquijreni Jesús, rniireni rajpni yälrnibee xten bendxab

(Mt. 12:22-30; Mr. 3:19-27)

¹⁴ Gulää Jesús te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxeloduxh reben xhidaalga.

¹⁵ Dxejc yu' reni räjp:

—Niguiire rbää rebendxab con yälrnibee xten Beelzebú ni rnibee loj rebendxab.

¹⁶ Sgaiireni rlajz guquuilrenini, ni'c canabreni gunni te seen ni siäd xhaguibaali.

¹⁷ Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäj te cuaani stee cuaaga, di gaçlaa sinijt gubierga lo guedxliuj. Palga te famil rdilnäj lagajc sa'ni, di gaçlaa sinitloj familga.

¹⁸ Palga guiliä' sa' rebendxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebendxab con lagajc yälrnibee xten Beelzebú.

¹⁹ Palga si'c najcni, ¿chuni'c rudeed yälrnibee loj rexpejntu te rbääreni bendxab? Lagajc laareni ruluui xhet laadi rujntu xhigab.

²⁰ Palga narä rbää rebendxab con xcälrnibee Dios, ni'cni ruluiloj abidzujn xcälrnibee Dios lojtu.

²¹ 'Cheni suga' te bendaan, ca'ni guiib, canäjni rolizni, rutliidi ruhualdi rehxixtenni.

²² Niluxh che jiäd stee ni nadipru lo bendaanga, rudxagdiñnini, rujnni gaanni, dxejc rudzucajni xquiibni ni badeed yälbendaan lojni, dxejc sajc chanäni guiraa rehxixtenni.

²³ Reni xhet yu'di xladä, rdxe'chreni loä. Ni di gutopnä j narä, rutie'chni.

24 Rāj̄pzani:

—Cheni rii te beṇḁxab neṇ lastoo te bej̄n, ricansajni nez lo reyubijdz, caguiilni cadro gusilajzni. Che cad rdxäldini, ruj̄nni xhigab, naani: “Guibisacä rolizä cadro biriä.”

25 Cheni guibi'ni, rdxäl̄ni lastoo bej̄nga si'c te yu' ni entis gulujx bilioobni, suchesa'cni.

26 Dxejcti rixiini sgajdz beṇḁxab ni ruj̄nr̄u lat-siaj lojni. Dxejc riu'reni neṇ lastoo bej̄nga, dxejc nalasru ria'n bej̄nga loj ni guj̄cni galoo.

Chicbaa renani riu xtidx Dios

27 Laḹ ni canii Jesús rediidxre, te nane' ni yu' lo rebeṇ xhidaalga dipli guniini, rāj̄pni:

—ḷChicbaa nan ni biäd̄näl̄u guedxliuj! Chicbaaza nani basḹaa luj.

28 Luxh laani rāj̄pni:

—Xhet si'c̄di najcni; chicbaaru rebej̄n ni rucua-diaj̄ xtidx Dios, ni ruzoobza xtiid̄xni.

Rebeṇgij̄dx rniab te milagwr si'c te seen

(Mt. 12:38-42; Mr. 8:12)

29 Sanuutis cadojp rebej̄n gabi Jesús, dxejc guslojni caniini, rāj̄pni:

—Rebej̄n ni yu' ṇaj beṇguidxduxh̄reni, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni.

30 Lagajc si'c ni gujc Jonás te seen loj rebej̄n guedx Nínive, si'c̄za narä, Xi'n Dios ni gujc Niguüi, gacä te seen lo rebej̄n ni nabaj̄n ṇaj.

31 Cheni guidzuj̄n dxej ni gac fis sistie te nane' ni gujc rein lo reyuj ni tre' ladbäj̄gw, sucuaqui-jni rebej̄n ni tre' guedxliuj ṇaj sa'csi laani biriini

zitduxh te bacuadiajgpacni yäl̄najn xten Salomón. Ree suga' galäiitu tej ni sacduxhru lo Salomón,

³² luxh ditu chalilajz xtiidxni. Rebejn̄ ni guläjz guedx Nínive sisiunäj rebejn̄ ni nabajn̄ naj̄ neñ redxej ni gac fis. Dxejc sucuaquijreni rebejn̄ ni nabajn̄ naj̄ sa'csi laareni, che huinäli Jonás xtidx Dios lojreni, basiechlajzreni, basa'nreni xtoj̄lreni. Ni suga' lojtu naj̄ sajcruni lo Jonás, niluxh ditu jiu xtiidxni.

Ni rusanij xcäriejn̄ bejn̄

(Mt. 5:15; 6:22-23)

³³ Räjpzani:

—Rut rucuaguïdi te bajl, te gusujnini te lat xhiga'tz, niclaza neñ te caj. Susujni bajlga jiaa te rajc ruhuisa'c chutis ni riu' neñ yu'.

³⁴ Balojlu najc si'c bajl xten xcäriejn̄lu. Palga ruhuisa'c balojlu, guideb xcäriejn̄lu yu' si'c bianij. Palga rajc balojlu dilu fisa'c, guideb xcäriejn̄lu yu' si'c lo nacäjy.

³⁵ Gunatiro te di gac xpianijlu yäl̄nacäjy.

³⁶ Palga guideb xcäriejn̄lu yu' bianijtis, xheti te lajt nacäjy, sajc fisa'clu guira'ti, si'c najc che rusanij te bajl neñ yu'.

Rucuaquij Jesús refarisee näjza rebejn̄ ni najn̄ leii

(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgaj̄n te farisee Jesús chääni rolijzni te chatajw̄ni. Sä'tireni. Che biu' Jesús, gurejni lo mex.

³⁸ Bidxeloj fariseega sa'csi dini niguiib̄ naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios.

³⁹ Dxejcti räj̄p Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yälgubaan näjza yällatsiaj.

⁴⁰ ¡Beñ nadduxh! ¿La ditu gacbee? Nani benchee dejtzni, bencheeza nenñi.

⁴¹ Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

⁴² ¡Probe'zatu, beñ farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguxhtis Dios näjza xcälrinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ ¡Proobza la'tu reben farisee! Rchagljaztu rbejtu lo reyagxhil xten rebejn ni sajc nen reguidobäz; rchagljaztu saru rnii rebejn “xchan Dad” lojtu che rijtu lo guii.

⁴⁴ ¡Probe'zatu! La'tu najctu si'c rebaa ni di guzeñ, rsiaj rebejn yejc cadre naga'reni luxh direni gan.

⁴⁵ Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nu-urnu.

⁴⁶ Dxejc räjp Jesús lojreni:

—¡Probe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rljaztu faltuni nicla con te bicuenabäztu.

⁴⁷ ¡Proobzatu! Sa'csi runcheetu xpa redade' ni gunii xtidx Dios galoo, luxh najctu rexajg renani bagu't redade'ga.

⁴⁸ Ni'cni najnpactu xhi gusajcreni, rchagljaz-zatu redzuun ni bejn retoxtadgoldootu; si'cza

gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ 'Ni'cni gunii Dios, sa'csi yuduxh xcälñajnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.”

⁵⁰ Loj rebejn ni nabajn naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj.

⁵¹ Guislojni xtiejn toAbel, näjza xtiejnli Zacarías ni bagu'treni galäii nez lodxan neñ guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'iProbe'za la'tu, rebejn ni ruluii leii! Sa'csi rniitu la'tistu rajptu yälñajn, luxh di rlanjtu chalilajztu xtidx Dios, dizatu gusaan chalilajz rebejn ni rlanj chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx,

⁵⁴ te cagula'tzreni don la sajc guiga'ni lo xhitis te diidx ni guiniini.

12

Jesús ruluii xcuent levaduur

¹ Lal ni caniini, bidojp xhidajl mil bejn ro'c, calaro'li sa'reni. Dxejc gusloj canixgaa Jesús loj rexpejn pacni, räjpni lojreni:

—Coñati levaduur xten refarisee, rusgueerene rniitisreni xhidajl diidx luxh direni gunni.

² Sa'csi xheti xhi niäu lojni ni di guxal lojni luxh xheti xhi naga'tz ni di jienloj.

³ Ni'cni guiraa ni guniitu lo nacäjy, sienni lo bianij xten dxej. Luxh ni gunii xhiga'tztu nen reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjpzani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni.

⁵ Guiniä lojtu chuni'c nanab guidxejbtu. Colguidxejb nani che abadzucajni yäl₁nabajn rajpni yäl₁nibee gusäl₁ni la'tu gabijl lo bajl ni cayejc par tejpas. Ni'csii colguidxejb.

⁶ 'Anajntu sajc jio' gaii mane' tio'p melbäz, luxh di Dios jiällajz nicla tej remane'ga.

⁷ Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjpzani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios.

⁹ Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit D₁xan xten Dios, di Dios gusiäjllajz xtojlni.

¹¹ 'Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu,

12 sa'csi che guidzujñ or ni guiniitu, Sprit Dxan xten Dios suluini xhini'c guiniitu.

Reyäl₁nasa'c rusajb bejn nen₂ dojl

13 Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhix-tenä ni basa'n toxtadnu loonu.

14 Dxejc räjp Jesús lojni:

—Dade', ¿chuni'c gule narä gunä yäl₁guxhtis o gacä abogaad lojlu, ä?

15 Dxejc räjpsac Jesús lojreni:

—Col₁natiro, colgantz₁' te di r₁lajztistu ga'ptu yäl₁nasa'ctis sa'csi xcäl₁nabajñ bejn dini gac yäl₁rajptis xhidajl xhi cos.

16 Dxejcti bij Jesús te cuent, räjpni lojreni:

—Guyu' te beñ rapduxh. Racduxh cose'ch lo rexcäjlni.

17 Dxejcti gusloj bejn₁ni xhigab: “¿Xhocha gunä? Dina gapä cadre cucheä recose'ch.”

18 Sas bejn₁ni xhigab: “Ananä xhini'c gunä. Gudzulä reyu' cadre rgucheä recose'ch, te gus-tiobä reyu'ga, te ro'c cucheä guiraa recose'ch näjza rehxixtenä.”

19 Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.”

20 Dxejc räjp Dios lojni: “¡Beñ najd! Lagajc gux-hijñre siniabä xaimlu. ¿Dxejca'? ¿Chu xca' guiraa recos ni gulucheelu?”

21 Si'c sisiajc guiraa rebejn ni rguiiltis xcäl₁nasa'creni lo guedxliujre, niluxh xhet rajpdireni loj Dios.

Rcanäj Dios rexi'nni
(Mt. 6:25-34)

22 Che gojł stera't, räjp Jesús loj rexpejn pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu.

23 Yäl nabajñ sajcruni lo yälrajw; tiejxhni sajcruni lo lajd ni rajcw bejn.

24 ¡Colhuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä?

25 Luxh ¿Chu tejtü palga runduxhni xhigab sajc tioobruni sgarol metr?

26 Palga di gacdi guntu nicla te cosbáz, ¿xhicuent ru'tu yärsia' xcuent xhi stee cos?

27 ¡Colhuii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla rei Salomón con guiraa xcäl nasa'cni, dini nisiuchee si'c rsiuchee reguiiga.

28 Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcní lo däj, aticaxh Dios suniidx xhi gacw la'tu, jbejn nani guxii rililajz!

29 Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'.

30 Si'ctis rujñ rebeñgedxliuj guideb xtijpreni rguilreni rexhicosre. Niluxh xtadtü ni yu' xhaguibaa anajñni xhini'c rquiintu.

31 La'tu colquiiltis xcäl rnibee Dios, dxejcti laani suniidxzani guiraa recos ni rquiintu.

*Yäl₁nasa'c ni yu' xhaguibaa**(Mt. 6:19-21)*³² Räj₂pzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl₁guxhtis lo xcäl₁rnibeeni.

³³ Col₁guto' xhixtentu, col₁gudeedni loj rebejn ni caquinduxhni, te si'c guntu te bols ni di jiu₁xh, te chu yäl₁nasa'c ne₁ni xhaguibaa cadre di gubaan jiu' niclaza xcabäj rexhicos.

³⁴ Sa'csi cadre rajptu xcäl₁nasa'ctu, ro'cza yu' las-tootu.

*Nanab susin₁tu*³⁵ Räj₂pzani:

—¡Col₁susin! ¡Col₁hualguij rebajl!

³⁶ Col₁yujn si'c remos ni cabäjz guibi' xlam₁reni ni sää te sa', te cheni guibi'ni guxhalgajcreni rolä'.

³⁷ Chicbaa remos ni susin₁ che guibi' xlam₁reni. Rniliäpac lojtu, lagajc xlam₁reni sajcwni xhajibni sibe'cni rexmosni lo mex, dxejc lagajc laani sudeedni xhi gaureni.

³⁸ Mase guidzuj₁ni garol yääl, mase guidzuj₁ni cäjyru, palga guidxäl₁ni arexmosni susin₁, ¡chicbaa remosga!

³⁹ Col₁yacbeepac, paru gacbee baxhuaan xten yu' xhi or₁ guidzuj₁ gubaan rolijzni, dini gusaan guxhalreni rolijzni te cuanreni xhixtenni.

⁴⁰ Näjza la'tu col₁susin₁, sa'csi or₁ ni ditu gun xhigab jäädni, sidzuj₁ Xi'n Dios ni gujc Niguui.

*Te mos guijdx**(Mt. 24:45-51)*⁴¹ Dxejc gunabdiidx Pedr lojni, räj₂pni:

—Dad, ¿la lootisnu rujylu cuentre o la najcni par guiraa rebejn?

⁴² Dxejc räjp Jesús lojreni:

—¿Chuni'c najc mos hueen, mos nasin, ni ru-sannäj xlamni guiraa rexmosni te gudeedni xhi gaureni che gal oor, ä?

⁴³ Chicbaa mosga palga laaca cayujnni che guibi' xlamni.

⁴⁴ Rniliäpac lojtu, lamga sudeed guiraa rehxix-tenni te xcanäj mosgani.

⁴⁵ Per palga gun mosga xhigab neñ lastooni: “Saclaa guibi' xlamä”, sas guislojni gusacsini re-samosni, gunaa sigajc niguüi, dxejc guisloj gauni, yäni, soozni;

⁴⁶ sibi' xlamni te dxej ni xhet cabäjzdinini, or ni dini gun xhigab guidzujnni. Dxejc sii sudeedni te castigwro lojni, sutiäjlni te duu dejtzni dxejc sinibeeni jiini, guidxaagni rebejn ni di gusobdiajg diidx.

⁴⁷ 'Mosga ni najn xhini'c rlajz xlamni gac, luxh dini susin, dizani guzoob xtiidxni, sutiälduxhrenei duu dejtzni.

⁴⁸ Niluxh mos ni di gan xhi rlajz xlamni gac, ni'c rujnni redzuun ni di xlamni guidxagljaz gac, guxi-iru castiigw gacni. Reni rca' xhidajl, xhidajlza riäjł gudeedrenei; loj reni rca' yälrnibeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹ Räjpa Jesús:

—Narä biälä te gucuaguiä guedxliujre; jmalaii alagusloj cayejcni!

⁵⁰ Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini.

⁵¹ ¿La rujntu xhigab biälä te jiädnäã yälrbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni.

⁵² Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni.

⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

Reseen xten retieimp

(Mt. 16:1-4; Mr. 8:11-13)

⁵⁴ Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riajbni.

⁵⁵ Che rbi' bej nez lad danbägw, rniitu: “Sacnalaa nadxej”, luxh si'c rajcni.

⁵⁶ ¡Bejn ni rusguee! La'tu racbeetu xhi säloj reseen ni rien lo guedxliuj näjza xhaguibaa, ¿xhicuent ditu gan xhi säloj retieimp ni dxunnu naj, ä?

Basiäjł diidx con rebejn ni rdxe'ch lojlu

(Mt. 5:25-26)

⁵⁷ Räjpzani:

—¿Xhicuent ditu quiil lagajc la'tu xhini'c najc huen, xhini'c najc laaca te guntuni?

⁵⁸ Sa'csi palga yu' chuni'c chale'c xquejlu lo guxhtis, lałni sanäni luj ro jusgaad, basiäjł diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusäurenı luj neñ latzguiib.

⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiejch lajztu te di guettu

¹ Lagajc dxejc, gubig gaii reni huisa'nreni diidx loj Jesús xcuent gaii beñ Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios.

² Sas räjp Jesús lojreni:

—¿La rujntu xhigab si'c gusajc reben Galileega sa'csi najcrureni beñdojl lo rebejn lajdxreni?

³ Narä rniä, dini gac si'c. Palga di'tu gusiechlajz sigajcza sejt guiragajctu.

⁴ O xcuent guitz unbichon rebejn nani gujt che gubixh te or ni laa Siloé yejcreni, ¿La rujntu xhigab najcrureni beñ dojl lo rebejn ni rbäjz guedx Jerusalén, ä?

⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxälni.

⁷ Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj!

⁸ Luxh xmosni räjp lojni: “Dad, basaanni steb ijz, guslää yuj ni'ni, gusälä aboñni.

9 Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusiajc Jesús te gunaa

10 Te dxej ni rusilajz rexpejn Israel caguluii Jesús neñ te guidobáz.

11 Ro'c suga' te nane' ni agujc tzunbichon ijz racxhuuni. Benđxab caguscoodni, niluxh di gacdi suliini.

12 Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

13 Che basujni naani yejcní, lagajc dxejc gujc gusulii nane'ga. Dxejc guslojni calä'pni xpala'n Dios.

14 Luxh dade' ni rnibee guidobáz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; neñ redxejga sajc jiäädte te jiajctú, per na'c jiäädte dxej ni rusilajz rexpejn Israel.

15 Dxejc badzu' Jesús diidxre, räjpni lojni:

—¡Ben rusguee! ¿La di chutis tejtú guxhec xconni o xpurni te chanänini yäni nis, mase najcni dxej ni rusilajz bejn, ä?

16 Luxh nane're najc te xagdoó toAbram, nani numbee Dios, ni agujc tzunbichon ijz baliib benđxabni, ¿la digacdi guixecni lo xcälguijdxni mase najcni dxej ni rusilajz bejn, ä?

17 Che gunii Jesús rediidxre, bianxtujy rebejn ni rdxe'ch loj Jesús, luxh rebeñ xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas
(Mt. 13:31-32; Mr. 4:30-32)

18 Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj?

19 Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhajcwni.

Xcuent cojb ni rusaguij
(Mt. 13:33)

20 Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios?

21 Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

Dää rolä' cadre jiu'ni xhaguibaa
(Mt. 7:13-14, 21-23)

22 Huinuu Jesús xnejzni sääni guedx Jerusalén. Lałni sadejdni reguejdx näjza rerench caguluiini rebejn.

23 Dxejc gunabdiidx te bejn lojni, räjpni:

—Dad, ¿la guxii najc rebejn ni calaa loj rextojreni, ä?

Dxejc räjpni lojreni:

24 —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlajz jiu'reni ro'c, niluxh direni gun gaan.

25 Cheni abasäu baxhwaan xten yu' rolä', dxejc la'tu ni suga' detz yu' guisloj gusejstu rolä', guini-itu: “Dad, baxhal-laa rolä’”, dxejc laani sudzu'ni diidx, siniini: “Dina ganä caro siäädту.”

26 Dxejc guislojtu guiniitu: “Bidxunnäänu, bidaunäänu, bidunnäänu luj, baseedlu nuurnu lo xnezyuunu.”

27 Dxejc siniini lojtu: “Rniliä lojtu, dipacnä gumbeä la'tu. Coljij guiraatu, beñlatsiaj.”

28 Dxejcti sonduxhtu, chubejli läjytu che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu.

29 Dxejga sidzujñ xhidajl beñzajt ni siäd ladjiaa, ladjiaät, ladbäjgw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex.

30 Luxh yu' reni rujntu xhigab guxii sajcreni ñaj, sacduxhrene dxejc. Yu'za reni rchalotu sacduxh ñaj, xhet sajcdireni dxejc.

Jesús biin xcuent guedx Jerusalén

(Mt. 23:37-39)

31 Lagajc dxejga, bidzujñ gaii refarisee, räjpreni lojni:

—Huij, biunejz ree, sa'csi Herodes rlaiz ju'tlu.

32 Dxejc laani badzu'ni diidxre lojreni, räjpni:

—Gojz lo bäjzga, beñ rusguee: “¡Bahuii! cabää rebendxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä xtzunä.”

33 Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxitis Jerusalén saj guetni.

34 '¡Probe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu

guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp.

³⁵ Bahuii xho bianxteb xquidootu. Ni'cni arnix-gaä lojtu, dirutu fii loä cheni guidzujnli dxej ni guiniitu loä: “Chicbaa ni siääd xcuent Dios.”

14

Rusiajc Jesús te bejn ni guidxa guij

¹ Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cag-ula'tz gaii refarisee, guidon xhini'c gun Jesús,

² sa'csi nez loj Jesús suga' te dade' ni guidxa guij tiejxhni.

³ Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajc gusiajcni te beñracxhuu dxej ni rusilajz bejn o la di gacdiní?

⁴ Per laareni dxitis suga'reni, niäutis ro'reni. Dxejc cua' Jesús beñracxhuuga, basiajcni, gubibeezani biunejzni.

⁵ Dxejc räjpni loj refarisee:

—Chu la'tu ni rajp te bur o te gon, palga jiajbni neñ te bisie, ¿la ditu chalägajcni mase najcni dxej ni rusilajz bejn, ä?

⁶ Dxejc di niajcni nudzu'reni diidx lojni.

Reni bidon chää sa'

⁷ Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

⁸ —Cheni guidontu chäätu te sa', na'c guntu te cuetu cuä' rebenro, te di guidzujn te beñroru lojlu,

⁹ dxejc jiaäd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li.

¹⁰ Maazru hueen, cheni guidonlu chäälü te sa', huicue lo mex ni zuj lo le' te che guidzujn bejn ni cayujn lanij, naani lojlu: “Xamigwä, gudaa cuelu nen yu' cadre rbej rebenro.” Si'c sä'p xpala'nlu nez loj guiraa rebejn ni sobganäjlu lo mex.

¹¹ Sa'csi ni rlaiz chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

¹² Räj pzani loj bejn ni cagudeed xhi gaureni:

—Cheni gunlu te lanij o guteedlu bejn lo xmexlu, na'c cuedxtislu reexamigwlu con rebejtzlu, con resa'lu, niclaza rexpisnlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni.

¹³ Che gunlu te lanij, alga gurejdx rebenproob, rebencoj, näjza rebenlotiä'p,

¹⁴ dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebenjut.

Xcuent te laniro

¹⁵ Che biejn diajg tej reni sobga' lo mex, räj pni loj Jesús:

—Chicbaa rebejn ni gau yätxtiil cadre rnibee Dios.

¹⁶ Dxejc räj p Jesús lojni:

—Guyu' te dade' ni bejn te laniro rolizni. Gu-nibeeni bidon xhidajl bejn te jiaätaunäjrenini.

17 Che bidzujn or ni gaureni, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.”

18 Dxejc guiragajcreni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.”

19 Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.”

20 Steeni räjp: “Entis bachnaä ni'cni di gacdi jiälä.”

21 Che gubi' mosga, badeedni diidx lo xlamni xhi räjp rebejn ga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj dää, gudanä rebenproob, rebencoj, rebenlotiä'p, rebennatiujnc.”

22 Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.”

23 Dxejc räjp lamga lo xmosni: “Huij lo renezyuj ni sii loj reguedxzijt, gudanäj rebejn ni guidxaaglu nejzga, te cha bejn rolizä.

24 Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

25 Laļ sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

26 —Palga yu' chu tej ni jiääd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnni, nägajcza xcäl nabajnni, di gacdi gacni te rexpenä.

27 Palga yu' chutis tej ni di rla^jz tedni trabajw te jiädna^jlⁿi narä, di gacdi gacni te rexpenäⁿpac.

28 Chu te^tu ni rla^jz gun te yuro, ni di gunx^gaa xhigab lacti meel chanä yu'ga, te guidon la sa^jc guluuxnini.

29 Didi cheni abejⁿni recimient, di gacdi guluuxnini, dxe^jc guiraa reni fii lo^jni suxhiznä^jrenini,

30 sä^jpreⁿi: “iBahuilaa^re! Be^jnre guslo^j bencheeni te yu' per di nia^jcdi nuluuxnini.”

31 ¿Chu te reⁱi ni gun xhigab chachagdi^jlⁿi stee reⁱi, ni di gunx^gaa xhigab don laa sa^jc gunni gaan con tzuu mi^l soldaad lo^j stee reⁱi ni siääd con ga^jl mi^l soldaad, ä?

32 Palga di gacdi gucuanä^jni, che gacbeeni zⁱ-jtli siääd stee reⁱiga, suxha^lni te xpe^jnⁿi chanab yäl^rbedxi lo^jni.

33 Ni'cni palga chutis te^tu di gusaan re^xhixt^enni te jiädna^jlⁿi narä, di gacdi gacni te rexpenäⁿpac.

Che diru se^jd gac nadzu^jy

(Mt. 5:13; Mr. 9:50)

34 Räj^pzani:

—Huen najc se^jd. Per cheni diruni gac nadzu^jy, ¿xho gacru gac nadzu^jyⁿi?

35 Xhetru sa^jcdini, nicla te chääⁿi lo^j yuj, niclaza te chääⁿi lo abon. Gusäl^tis be^jn se^jdga. Reni rla^jz gucua^dia^jg xti^dxä, sucua^dia^gsa'creni.

15

Xcu^ent xiil ni guni^jt

(Mt. 18:10-14)

1 Guiraa reni rusqui^x impuest nä^jza reb^endo^jl cabigreni lo^j Jesús, te cuadia^jg^reni rexti^dxni.

² Refarisee näjza rebejn ni ruluii leii gusloj camojmreni, räjpreni:

—Bejnre rusaan rbig rebendojl lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴—Chutejtu ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä?

⁵ Luxh che guidxälñini sibatuxh lajzni, dxejc sutzubnini ro xhajcwni.

⁶ Che guidzujñni rolijzni sutojpnì rexamiigwni näjza rexpisñni te gäbni lojreni: “Colguibalaznäj narä sa'csi abidxälä xile' ni gunijt.”

⁷ Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiech-lajz xtojlni quela xcuent tapbitzubigaa bejn ni di guiquiin gusiechlazreni xtojlni.

Xcuent meel ni gunijt

⁸ Räjpszani:

—Sigajcza te gunaa ni rajp tzuu meel, palga chasälñi tejni, ¿la dini gusanij te bajl te guloobni neñ yu' hasta guidxälñini, ä?

⁹ Luxh che guidxälñini, sutojpnì rexamiigwni näjza rexpisñni, säjpnì lojreni: “Colguibalaznäj narä sa'csi abidxälä meel ni gunijt.”

¹⁰ Rniäza lojtu, sigajcza sibalajz rexangl Dios xhaguibaa xcuent te beñdojl ni rusiechlajzni.

Te bejn ni baxun te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni.

12 Dxejc xi'nni ni najc huinruga, räjpni lo xtadni: “Dad, baniidx yäl₁nasa'c nani nungäjl̄ xca'a.” Sas badeed xtadni xerensni.

13 Di niac₁laa, balsi dxej gudejd, chela bato' xihuinni guiraa xhix₁tenni, dxejc sääni, bidzuj₁nni te guedxzij₁t. Ro'c banij₁t₁ni guiraa xmeel₁ni lo recosguij₁dx.

14 Che abanij₁t₁ni guiraa xhix₁tenni, biääd te gubinduxh guedxzij₁tga cadro yu'ni. Sas guslojzani calaanni.

15 Dxejc huitiil₁ni dzuun lo te benguej₁dxga. Baxha₁ bejn₁gani te huigaj₁pni cuch lo xyuj dade'ga.

16 Luxh calanduxh₁ni bejn₁ni xhigab malaii sajc gauni recuaan ni najc si'c lia ni cayajw recuch, niluxh rut badeeddi xhi niajw₁ni.

17 Lal̄ ni cadejd₁ni trabajwga, bianij xcäriej₁nni bejn₁ni xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä.

18 Guibi'älis ladxä, rolijz xtadä, gäpä lojni, Dad, banitä lo Dios näjza lojlu.

19 Diru nungäjl̄ guirilaä xi'nlu. Cua' narä si'c te xmoslu.”

20 Dxejc gunazgaj₁cni nejz te gubi'ni rolijz xtadni.

'Cheni zijtru siääd₁ni, bahu₁i xtadni lojni. Dxejc balaslajz₁nini, ruxu₁nl₁ni, huichagloj₁nini, sas gudäälz₁nini, bachagro'ni lojni.

21 Dxejc räjp xi'nni lojni: “Dad, abanitä lo Dios näjza lojlu. Diru nungäjl̄ guirilaä xi'nlu.”

22 Per räjp xtadni loj rexmosni: “Col₁tanä te ladsa'c, col₁shuajcwn₁nini xi'nä, col₁gusäl̄ te niil bicueña₁ani, xcajza te gura'ch ni'ni.

23 Coltanä te biser ni guro' colgu'tni. ¡Colsqejn te guidauunu, jiennu te lanij!

24 Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnreni te lanij.

25 'Lal ni cayajc dee, xingangalooni cayujn dzuun lo niaa. Che gubi'ni, siäddzujungajxhni rolijzni, che biejn diajgni cayel rolijzni, caguya'zareni.

26 Dxejcti gurejdxni te mos, gunabdiidxni lojni xhi cayajc royu'.

27 Dxejc räjp mosga lojni: “Gubisac bejtzlu, luxh xtdlu gunibee gujt te biser guro' te gac lanij sa'csi nadaanni gubi'ni.”

28 Dxejc bidxe'ch xingangalooni. Naadtini jiu'ni rolijzni. Che gucbee xtdni naadtini jiu'ni, bihuii xtdnini te gunabni jiu'gani.

29 Dxejc räjpni lo xtdni: “¡Bahuilaa! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con reexamigwä.

30 Luxh naj ni abidzujn xi'n lure, ni banijt xmeellu con regunadxab, xhoxh bagu'tlu te biser guro' te cayujnlu xlanijni.”

31 Dxejc räjp xtdni lojni: “Xi'nä, sugagajclu loä, luxh guiraa ni rapä najc xtenlu.

32 Niluxh naj riäjlpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni.”

16

Xcuent te ni rnibee loj remos

1 Dxejc cayujyza Jesús stee cuent loj rexpejn_{pacni}, räjpni:

—Guyu' te be_nrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: “Bejn ni rnibee loj rexmoslu xhetlaadi cayujnni cagunijtni rehxixtenlu.”

2 Dxejcti gurejdx xlam_nnini, räjpni lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.”

3 Dxejc bejn_{ga} bejn xhigab: “¿Xhichani'c gunä naj ni gudzucaj xlam_a dzuun loä? Dina ga'pä yäl_rstijp te gunä dzuun lo niaa, luxh situjyä chanabä gojn.

4 Ananä xhini'c gunä te che dirunä ga'pä dzuun, sibejdx rexamigwä narä rolizreni.”

5 Dxejcti gurejdxni tebgajreni rebejn ni nazäab lo xlam_nni, dxejc räjpni loj ni bidzun_xgaa: “¿Lac nazääblu lo xlam_a?”

6 Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtze, bacuaa tiubitzuutis baril nazääblu lojni.”

7 Dxejc gunabdiidxni loj steeni, räjpni: “¿Luj a'? ¿Lac nazääblu lo xlam_a?” Dxejc räjpni lojni: “Te gayuu dxim_{ro} triuu.” Dxejc räjpzani: “Aree xquijtzu; bacuaa tajtis dxim_{ro}.”

8 Bidxeloj xlam_nni, gulä'pni xpala'n be_nguijdxga ni gunibee sa'csi bisin_nni bejn_ni recosga. Dxejc räjpza Jesús, rebejn ni di gumbee xtidx Dios nadxällajzruren_ni lo rextzuunreni con sa'reni loj rebejn ni arumbee xtidx Dios.

9'Rniä lojtu, col_{quiil} rexamiigwtu con reyäl_nasa'c ni räjp_{tu} loj guedxliujre, te che abaraj xhixtentu,

sica' Diostu xhaguibaa cadre yu' rolijztu par tejpas.

10 'Renani runsa'c dzuun lo te dzunbáz, sajcza gunsa'cni dzuun lo te dzunro, luxh reni di gacdi gunsa'c dzuun lo te dzunbáz, di gacdiza gunsa'creni dzuun lo te dzunro.

11 Ni'cni palga xhetlaadi cuarälnäjtu reyäl̄nasa'c xten guedxliuj, ¡xho guniidx Dios reyäl̄nasa'c xtenni lojtu!

12 Palga xhetlaadi cuarälnäjtu xhixten bejn̄, ¿chu guniidx lojtu ni gac xtenpactu, ä?

13 'Nicla tej mos di gacdi gunni dzuun lo tio'p lam̄, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn̄ xtzun Dios lāl̄ ni sanälajztisni xcäl̄nasa'cni.

14 Mbaj naj, refarisee, sa'csi rchaglazduxhreni meel, cacuadiagdzu'tzreni xtiidxni, dxejc caguxhisnäjreni Jesús.

15 Dxejcti räjp Jesús lojreni:

—La'tu najctu bejn̄ ni ruhuii rebejn̄ lojtu, naareni beñsacduxhtu, niluxh acanajn Dios xhi xhigab rujntu neñ lastootu. Sa'csi guiraa ni rchalojtu najc yäl̄nasacduxh, guiraa ni'c rbixhlajz Diosni.

Xleii Moisés con xcäl̄rnibee Dios

16 Räjpzani:

—Dxejli ni biäd Juan ni rutiobnis, guyu' xleii Moisés, najza xtidx redade' ni gunii xtidx Dios. Cheni biäd Juan gusloj rsule' didxsa'c xcuent xcäl̄rnibee Dios, ni'cni xhidajl bejn̄ cagusutijp lajzni te jiu'reni loj yäl̄rnibeeega.

17 Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Rului Jesús xcuent ruŕo'n sa' bejn
(Mt. 19:1-12; Mr. 10:1-12)

18 Rájpzani:

—Palga guŕo'n te bejn cháalni, dxejc guchñaani stee gunaa, rujnni dojl, luxh nani ruchña te gunaa ni abarŕo'n cháalnini, niguiiga rujnzani dojl.

Te benrajp näjza Lázaro

19 Rájpzani:

—Guyu' te benrajp ni rchaglajz rajcwni ganax reladsacduxh, luxh guixe-guixee rujnni laniro.

20 Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni.

21 Rlajzni maläi xho gunni gauni nani rtejb loj xmex benrajpga, luxh direni gusaan. Dxejc rebä'cw siäd rilejp loj reguejdx ni rgaadz ni guidxa tiejxhni.

22 Guyu'ti te dxej gujt benproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza benrajpga gujt, huicua'tztirenini.

23 Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro.

24 Dxejcti guredxaduxh benrajpga, räjpn lo Abram: “iXtadä Abram! Balazlajz narä, baxhał Lázaro guhuajdxni yejc bicuenaani nis te gusiälyujni ludxä, sa'csi ree cadedä trabajwduxh lo guiboo.”

25 Luxh räjp Abram lojni: “Xi'nä, basaa lajzlu che gubajnlu lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh.

26 Luxh di gacdi jiäd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gac diza ted reni yu' ro'c te jiädreni loonu.”

27 Dxejcti räjp benrajpga lojni: “Rniabduxhä lojlu, xtadä, baxhallaa Lázaro chääni roliz xtadä,

28 sa'csi ro'c yu' gaii betzä, te chaliidxni laareni, te gusiechlajzreni, te di näjza laareni jiädreni ree cadro rdejd bejn trabajwduxh.”

29 Dxejc räjp Abram lojni: “Arajpreni guitz cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.”

30 Luxh benrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chanii lojreni, dxejc sii pet susiechla-jzreni.”

31 Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibansac loj rebengut.”

17

Riesgw jiajbni lo dojl
(Mt. 18:6-7, 21-22; Mr. 9:42)

1 Räjp Jesús loj rexpejn pacni:

—Siäd pac recos ni gun jiajb bejn lo dojl.
Proobza bejn ni rujn riajb bejn lo dojl.

² Maaz guliibni te guij xten molin guejnni, gusäl bejnni lo nisdoo cadro jiätro quela gunni jiajb rexi'nä ni ahuililajz xtidxä.

³ ¡Col̄susiñ!

'Palga gun bejtzlu dojl̄ lojlu, baliidxni. Palga gusiechlajzni, basiäj̄l̄ diidx con laani.

⁴ Masque gajdz huält nen̄ teb dxej gunni dojl̄ lojlu, palga jiädniini lojlu gajdz huält, naani: “Xhet laadi benä, basiäj̄l̄ lajzlu”, basiäj̄l̄ lajz con laani.

Bastioob xcärl̄r̄ililaaznu

⁵ Gunii rexpejn̄pacni lo Jesús, räjpreni:

—Dad, baniidxru yärl̄rililajz loonu.

⁶ Dxejc räjp Jesús lojreni:

—Palga rajptu yärl̄rililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxa' ro'c, guzuj galäii nisdoo”, susobdiajg yajga xtiidxtu.

Ni riäj̄l̄ gun te mos

⁷ Räjpszani:

—¿Chu tejt̄u ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”?

⁸ Dini gäb si'c. Niluxh säjpni lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu.”

⁹ Dini gudeed xquixtios lo mosga sa'csi rujnni recos ni gunibeeni sa'csi si'c riäj̄l̄ gunni.

¹⁰ Sigajcza la'tu, che luux guntu guiraa redzuun ni guniä guntu, riäj̄l̄ guiniitu lo Dios: “Najcnu mos ni xhet sajcdi, nani riäj̄l̄ jiennu, ni'tcis biennu.”

Basiajc Jesús tzuu bejn̄ ni ral̄ tiejxhreni

11 La_l ni sasaj Jesús nez guedx Jerusalén, gudej_dni loj región Samaria näjza región Galilee.

12 Che biu'ni tej reguejdxga, huichagloj Jesús tzuu bej_n ni rajc te yälguijdx ni ra_l tiejxh_reni, niluxh zijtru guzuj_reni.

13 Dxejc rbedxa'reni räjp_reni:

—Jesús, Dad, Mastr, balaslajz nuurnu.

14 Che bahuii Jesús loj_reni, räjp_rni loj_reni:

—Co_lchäj, te fii rebixhojz abiaj_ctu.

La_l ni sääreni, bia tiejxh_reni.

15 Dxejc tej_reni, che bahuiini abiaj_cni, gubiguxu_nni, cabedxa'ni calä'p_rni xpala'n Dios.

16 Bazuxhijb_rni nez loj Jesús, basajb_rni loj_rni lo yuj cagudeedni xquixtios loj Jesús. Luxh bej_rre najc te be_nzijt, te be_n Samaria.

17 Dxej_cti räjp Jesús loj_rni:

—¿La et tzuudi najc reni biaj_c, ä? ¿Con sgaareni?

18 ¿La rutru gubi'di loä te guiliä'p_reni xpala'n Dios, xtebtis be_nzijt_re, ä?

19 Dxejc räjp Jesús loj bej_rre:

—¡Huisulii, huij! Abiaj_clu sa'csi huililajzlu.

Xho guidzuj_n xcäl_rnibee Dios

(Mt. 24:23-28, 36-41)

20 Dxejc, sa'csi agunabdiidx refarisee loj Jesús guc guidzuj_n xcäl_rnibee Dios, badzu'ni diidx_re, räjp_rni loj_reni:

—Di xcäl_rnibee Dios guidzuj_n con seen ni saj_c fiitu.

21 Diza bej_n naa: “Bahuii, aniree”, o “Anirec”, sa'csi abidzuj_n xcäl_rnibee Dios loj_rtu.

22 Dxejc räjp Jesús lo rexpej_npacni:

—Sidzujn dxej rlanjgatu fiitu te dxej sa' ni chu che jiädsac Xi'n Dios ni gujc Niguui, luxh ditu fini.

²³ Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii.

²⁴ Sa'csi sigajc ni rien che rdinya' te laad xh-aguibaa hasta stelaad xhaguibaa, si'cza gac che jiälä narä, Xi'n Dios ni gujc Niguui, che gal dxej guibi'ä.

²⁵ Luxh ganiddoo sidedä trabajwduxh, sa'csi sibälaz reben guedxliuj ni tre' naj narä.

²⁶ Si'cni gujc nen redxej cheni gubajn toNoé, si'cza gac nen redxej che jiälä narä, Xi'n Dios ni gujc Niguui.

²⁷ Nen redxej ni gubajn toNoé gudajwreni, gu'reni, bachnaareni, badeedzareni xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis.

²⁸ Sigajcza gujc nen redxej ni gubajn toLo't: gudajwreni, gu'reni, gusiireni, bato'reni, gule'creni binij, bencheezareni rolizreni.

²⁹ Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunit-lojti guiraa rebejn dojl, huejcreni.

³⁰ Sigajcza gac nen redxej cheni jiälä narä, Xi'n Dios ni gujc Niguui.

³¹ Dxejga, palga yu' chu niä'p yejc yu', diru gal di jäjtni te chalääni rehxixtenni ni yuchee nen yu'; palga yu' chu suga' nezjiät, di gal diruni guibi'ni rolizni.

³² Colgusnaj lajztu xhi gujc chääl toLo't.

³³ Ni rlanj ga'p xcäl nabajnni lo guedxliujre, suni-

jtnini, nani gunijt xcäl̄nabaj̄n̄ni lo guedxliujre xcuent rextid̄xä, xcäl̄nabaj̄n̄ni rajpni xhaguibaa.

³⁴ Rniä lojtu, guxhij̄nga ni jiälä lo tio'p reni naga' lo te da', chää tejni, steeni jia'n.

³⁵ Lo tio'p gunaa ni cayo't, chää tejni, steeni jia'n.

³⁶ Lo tio'p bejn̄ ni yu' lo niaa, chää tejni, steeni jia'n.

³⁷ Che biejn̄ diajgreni rediid̄xre, gunabdiid̄xreni lojni, räjp̄reni:

—Dad, ¿caro gac recosre?

Badzu' Jesús diid̄xre, räjp̄ni:

—Cadro naga' te mangut, ro'c rdojp̄ regolbetz.

18

Xcuent te gunabiuud con te juejz

¹ Bijza Jesús te cuent ni ruluii lojreni, te guisiee-dreni xho riajl̄ cuedx-guiniabreni lo Dios lacuaa gac-huin lajzreni,

² räjp̄ni lojreni:

—Te guejdx̄ guyu' te juejz ni di chalilajz̄ xtid̄x Dios, dizani jiū rebejn̄.

³ Lagajc̄ guejdx̄ga guyu' te gunabiuud. Guixe-guixee rijni lo juejz, rniabni lojni gunni yäl̄guxhtis lo bejn̄ ni rdxe'ch lojni.

⁴ Balti dxej̄ naadti juejzga gun yäl̄guxhtisga. Dx-ejcti bejn̄ni xhigab, naani: “Mase dina guidxebä Dios, dizana jiuǟ rebejn̄,

⁵ sa'csi gunabiuudre sanuutisni siäd̄ni loä, abasiedliini narä, gunälis yäl̄guxhtis̄ xten gunaaga, te di chanuutis̄ riäd̄gusieedni narä.”

⁶ Dxejc̄ räjp̄ Jesús lojreni:

—Riejn̄ diajgtū xtid̄x̄ juejzguijdx̄ga,

7 Naj çxho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni.

8 Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguui, çla sidxälni bejn ni rililajz xtiidxni lo guedxliuj?

Xcuent te farisee con te ni rusquijx impuest

9 Bij Jesús stee cuent ni rului loj rebejn ni rluiisi najc be_nsa'c, ni rchalo xhet sajcdi resabejnreni. Räj_pni:

10 —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest.

11 Sulii fariseega la_l ni canabni lo Dios, räj_pni: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc be_n nadiplajz, ni najc be_ndoj_l, dizana gacä si'c najc bejnre ni rusquijx impuest.

12 Rucua'nä tio'p huält ne_n te xmaan, luxh rud-edä te tzuu lo te beex loj guiraa ni runä gaan.”

13 Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiäl_naatisni lastooni, caniini lo Dios, räj_pni: “Dad, Dios, jbalaslajz narä, nacä te be_ndoj_l!”

14 Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextoj_lni, niluxh di Dios nudzucaj rextoj_l be_n farisee. Sa'csi guiraa rebejn ni rlajz guiliä'p lagajc xpala'nni, susanxtiujy Diosreni, dxejc reni di rlajz guiliä'p lagajc xpala'nreni, siliä'p Dios xpala'nreni.

*Benle' Jesús yejc rebiuxbäz
(Mt. 19:13-15; Mr. 10:13-16)*

15 Yu'reni siädinä rexpiuxbäzreni loj Jesús te guzujni ñaani yejcreni. Che bahuii rexpejn̄pacni si'c, gusloj cadildiidxreni con rebejn̄ te na'c jiädnäreni rebiuxe'.

16 Dxejc gurejdx Jesúsreni, räjpni lojreni:

—Colgusaan jiäd rebiuxe' loä, na'c gudxojn̄tureni, sa'csi xcäl̄rnibee Dios najc xten reni najc nadolajz si'c rebiuxbäze're.

17 Rniliäpac lojtu, chutis ni rlajz jiu' lo xcäl̄rnibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcäl̄rnibee Dios.

*Te bi'n ni rajp xhidajl xhixtenni
(Mt. 19:16-30; Mr. 10:17-31)*

18 Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yäl̄nabaj̄n par tejpas?

19 Dxejc räjp Jesús lojni:

—¿Xhicuent rniilu narä: “Mastrsa'c”? Rutru najcdi bensa'c, xtebtis Dios.

20 Anajnl̄u xho najc remandamient ni caj lo xleii Moisés: “Na'c guesnäjl̄u gunaa ni di gac chäällu; na'c ju'tlu bejn̄; na'c cuanlu, na'c guiniilu didx-xhii xcuent bejn̄; bazoob xtidx xtadlu, xnanlu, bahuiizareni.”

21 Dxejc räjp bi'nga lojni:

—Guiraa remandamientre rusobä cheni gucäli biuux.

22 Che biejn̄ diajg Jesús xtiidxni, räjpni lojni:

—Tejtis cayäadx gunlu. Bato' guiraa rehxixtenlu, gudisni loj rebejn̄ ni xhet rajpdi dxejc sajplu xcäl̄nasa'clu xhaguibaa. Dxejc gudanajl narä.

23 Che biejn diajg bi'nga rediidxre, guchuinduxh lajzni, sa'csi najcni te bejn ni rapduxh.

24 Dxejc rdxelojtis Jesús lojni, guchuinza lajzni räjpni:

—Naganduxh jiu' rebenrajp lo xcälrnibee Dios.

25 Guyasiru ted te cameii ni' te guux lo ni jiu' rebenrajp lo xcälrnibee Dios.

26 Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

27 Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

28 Dxejc räjp Pedr lojni:

—Dad, nuurnu abasa'nnu guiraa rehxixtenu te siopnalnu luj.

29 Dxejc badzu' Jesús diidxre lojni, räjpni:

—Rniliäpac lojtu, chutis ni gusaan rolijzni näjza rexcuzajnni, rebejtzni, chäälni, xi'nni xcuent xcälrnibee Dios,

30 sica'ni xhiroobru lo guedxliujre, luxh sica'ni yälñabajñ par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

31 Gurejdx Jesús rexpejnñpacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii.

32 Sutedrenini ladzñaa rebenzijt, suxhiznäjrenini, susacsírenini, sutiobxhejnñlireni lojni,

33 luxh che luux quiinrenini, dxejc sugu'trenini, luxh ni riojn dxej sibañsacni loj rebengut.

34 Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacbeereni.

*Rusiajc Jesús te beṇ lotiä'p
(Mt. 20:29-34; Mr. 10:46-52)*

35 Cheni sadzujṇ Jesús te guejdx ni laa Jericó, sobga' te beṇ lotiä'p ro' nezyuj, canabni gojn.

36 Che biejn diajgni cadejd xhidajl bejṇ lo nezyu-jga, gunabdiidx beṇ lotiä'pga xhini'c cayajc.

37 Dxejc räjpreni:

—Jesús ni siääd Nazare't cadejdni nezga.

38 Dxejc guredxa'ni räjpni:

—¡Jesús, xi'n toDavid, balaslajz narä!

39 Rebejṇ ni nijd lojreni gudilnäjreni beṇ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

40 Dxejc guzudxi Jesús ro'c, gunibeeni jiädnäreni bejṇga lojni. Che bidzujṇni lojni, gunabdiidx Jesús lojni, räjpni:

41 —¿Xhini'c rlajzlu gunnäã luj?

Badzu' beṇ lotiä'pga diidxre, räjpni:

—Dad, rlazä jien loä.

42 Dxejc räjp Jesús lojni:

—¡Sujien balojlu! Abiajclu sa'csi huililajzlu.

43 Lagajc dxej, bienṅajc lojni, calä'pni xpala'n Dios, huinajlṇi Jesús. Luxh guiraa rebejṇ ni bahuii xhi guzajcni, gulä'pzareni xpala'n Dios.

19

Huij Jesús rolizj te bejṇ ni laa Zaqueo

1 Dxejc biu' Jesús guedx Jericó, sadejdzani guejdxga.

² Ro'c rbäjz te beṇrapduxh, ni laa Zaqueo, ni rnibee lo reni rusquijx xcuent impuest.

³ Rlajz Zaqueo fiini loj Jesús te gumbeenini, per digacdi fiini lojni sa'csi najcni te beṇxhate', luxh xhidajl bejn siädsaj guideb gabi Jesús.

⁴ Ni'c baxuṇni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús.

⁵ Che gudejd Jesús nejzga, guläsni lojni jiaa, bahuiini cadro sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolijzlu.

⁶ Dxejcti biätguxuṇ Zaqueo lo yajgga, rbalazduxhni huinäni Jesús rolijzni.

⁷ Che bahuii guiraa rebejn xhi gujc, gusloj camojmreni, direni jiulajz, räjpreni:

—Jesús sajia'n rolijz te beṇdojl.

⁸ Dxejcti huisulii Zaqueo, räjpni loj Jesús:

—Bahuilaare, Dad, gala' xhixtenä gudedä loj rebenproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

⁹ Räjp Jesús lojni:

—Lagajc nadxej gubicaj xtojllu näjza xtojḷ reni rbäjz rolijzlu, sa'csi guliipac najclu te xagdoo toAbram.

¹⁰ Pues Xi'n Dios ni gujc Niguui biädtil rebendojl te guslaani rebejnğa ni gunijt neṇ dojl.

Xcuent tzuu meel

¹¹ Laḷ ni cagucuadajgreni xtidx Jesús, bijzani te cuent ni ruluii, sa'csi asiäddzujṅgajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzujṅni guejdxga.

12 Dxejc räjpni lojreni:

—Guyu' te bejn, beñrajpni, huijni te guejdx zijtro te gacni reii, dxejc guibisacni.

13 Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn dzuun con meelre che guibisacäli.” Sä'tini.

14 Per rebeñ lajdxni dipacreni guichagljaz bejnga, ni'c baxhalreni gatii bejn te saye'tzreni: “Di rlanjdinu gacni xreiiinu.”

15 Luxh empac gujcni reii, dxejc gubisacni lajdxni. Che bidzujñni gurejdxni rexmosni ni badeedni meel cua'reni, te gacbeeni lac bejn tejgareni gaan.

16 Ni bidzujñ ganid räjpni lojni: “Dad, xmeellu bejn gaan stzuu meel.”

17 Dxejc räjp reii lojni: “Hueenca, luj najclu te mossac, sa'csi laaca bejnlu dzuun lo te dzunbáz, naj sunidxä guinibeelu loj tzuu guejdx.”

18 Bidzujñ stee mos lojni, räjpni: “Dad, xmeellu bejn gaan gatii meel.”

19 Dxejcti räjpni lojni: “Luj guinibeelu loj gatii guejdx.”

20 Bidzujñti stee mos lojni, räjpni: “Dad, aree xmeellu, guluchedzu'tzäni neñ te baii

21 sa'csi bidxebä guejblu, sa'csi najc guejblu te beñ nadiplajz, rutojp guejblu cadre di guejblu nuzuj, luxh rliäs guejblu cose'ch cadre di guejblu nibe'c.”

22 Dxejcti räjp reii lojni: “¡Mosguijdx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadre dina nusuä, najnlu rliäsä cose'ch cadre dina nibe'cä,

²³ ¿Xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?"

²⁴ Dxejc räjpni loj reni suga' ro'c: "Colgudzucaj meelga lojni, colgudeedni loj ni rajp tzuu meel."

²⁵ Laareni räjpreni: "Dad, per laani arajpni tzuu meel."

²⁶ Dxejc badzu' reii diidxre lojreni, räjpni: "Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbáz ni rajpreni.

²⁷ Luxh xcuent reni rdxe'ch loä, ni di rlanj niacä reii lojreni, coltanäreni ree, colgugu'treni nez loä."

*Che biu' Jesús guedx Jerusalén
(Mt. 21:1-11; Mr. 11:1-11; Jn. 12:12-19)*

²⁸ Che gulujx guniini guiraa rediidxre, huinuuni xnejzni, sääni nez lo guejdx Jerusalén.

²⁹ Che asadzunğajxhni reguejdx ni laa Betfagé nájza Betania, gajxh lo dajn ni laa Oliib, baxhalni tio'p rexpejnpacni,

³⁰ räjpni lojreni:

—Colchäj lo guejdx' ni suga' lad rec. Che guidzujntu, guidxältu caduu te bur huin ni gajd bejn cuib. Colguxhecni, coltanäni ree.

³¹ Palga yu' chu guiniabdiidx lojtu: "¿Xhicuent caguxhectuni?" colye'tz lojni: "Dad caquiinnini."

³² Sä'ti rexpejnpacni nani baxhalni, bidxälreni manga sigajctisni räjp Jesús.

³³ Cheni caguxhecreni bure'ga, rexpaxhuan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhajbreni dejtzni, te gubijb Jesúsni.

³⁶ Guideb cadre gudejd Jesús gudixhreni xhajbreni lo nezyuj cadre tedni.

³⁷ Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnñi.

³⁸ Räjpreni:

Chicbaa reii ni siääd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädñajllu te na'cru guiniireni si'c.

⁴⁰ Dxejc Jesús räjpre lojreni:

—Rniliä lojtu, palga redee gusaü ro'reni, sixedxa' reguijre.

⁴¹ Che bidzujñni gajxh, che bahuiini guedx Jerusalén, biin Jesús xcuent guejdxga,

⁴² räjpreni:

—¡Maläii gacheelu, masque neñ redxejre, xhini'c sajc guniidx yälrbexilajz lojlu! Per ñaj naga'tzni, luxh digacdi fiilu lojni.

⁴³ Sidzujñ dxejga lojlu, cheni jiääd reni rdxe'ch lojlu sujñreni si'c te guralyuj guideb gabilu, nez lojlu sigajc nez dejtzlu sisiujreni.

⁴⁴ Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuiilu.

*Rusia Jesús nen guidoro**(Mt. 21:12-17; Mr. 11:15-19; Jn. 2:13-22)*

⁴⁵ Dxejcti biu' Jesús nen guidoro, guslojni cabääni rebejn ni caguto' nájza reni casii.

⁴⁶ Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadre jiadnabtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee caguluii Jesús nen guidoro, luxh reni rnibee loj rebixhojz nájza rebejn ni ruluii leii, nájza rebeṅgool xte guejdxga caguuilreni mood te ju'trenini,

⁴⁸ luxh direni nidxäjl xho niujnrenini sa'csi guiraa rebejn cacuadiagdzu'tzreni xtiidxni.

20*Xcälrnibee Jesús**(Mt. 21:23-27; Mr. 11:27-33)*

¹ Te dxej suga' Jesús nen guidoro, caguluiini rebejn, cagusule'zani diidx xcuent xho guibicaj xtojlreni, che bidzujn reni rnibee loj rebixhojz nájza rebejn ni ruluii leii nájza rebeṅgool,

² räjpreni lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

³ Dxejcti räjp Jesús lojreni:

—Narä sigajcza gunä te yälgunabdiidx lojtu, colgudzu' diidxre loä,

⁴ ¿chuni'c baxhał Juan te gutiobnisni rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?”

⁶ Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisi.

⁸ Dxejc räjp Jesús lojreni:

—Dizana guiniä xhi yälrnibee rapä te runä resocre.

Xcuent remosguijdx

(Mt. 21:33-44; Mr. 12:1-11)

⁹ Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c.

¹⁰ Che bidzujn dxej ni guidojp cose'ch, baxhalni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanäni lo xpaxhuaan yujga.

¹¹ Dxejcti baxhalni stee mos lojreni. Dxejc sigajcza gudilnäjrenini, gudijnrenini, luxh xhetza badeedireni lojni, ganaxni gubi'ni lo xlamni.

¹² Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³ 'Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.”

¹⁴ Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni

reyujre. Do'o guigu'tnuni te nuurnu xca'nu yujre gacni xtennu.”

15 Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben guijdxre, ä?

16 Sidzujñni, sugu'tni guiraa reni cayujn dzunmeed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

17 Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

18 Chutis ni jiajb yejc guijga, sianduxhni, per nani jiajb guijga yejcní siujypacni, li däj gacni.

Xcuent reimpuest

(Mt. 21:45-46; 22:15-22; Mr. 12:12-17)

19 Reni rnibee loj rebixhojz, näjza reni ruluii leii rlazreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn.

20 Dxejc cagula'tztisrenini, baxhala'reni gaii bejn te gunsireni si'c ni najcreni bendxan, te gucuaadi-ajgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte gubernadoor.

21 Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu' chu najc bejn, ruluisa'c guejblu xnez lo Dios.

²² Gunilaa loonu, ¿la laaca guidiixnu reimpuest loj x cubieer César o la xhet laadini, ä?

²³ Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree?

²⁴ Baluui loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelajtisreni lo rextiidxni, biäuti ro'reni, guzudxireni.

*Rniabdiidxreni xcuent yälrbansac lo rebeņgut
(Mt. 22:23-33; Mr. 12:18-27)*

²⁷ Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebeņgut. Ni'cni gunabdiidxreni loj Jesús,

²⁸ räjpreni:

—Dad, Mastr, basa'n Moisés guiitz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.”

²⁹ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni.

³⁰ Dxejcti cua' ni rojpga gunaaga. Che gujtni, rutiza xi'nni.

³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'.

³² Dxejcti näj gunaaga gujt.

³³ Guigajdzreni guläsnäjreni gunaare, ni'cni, che guibaṅsacreni lo rebengut, ¿chu chääł gacni, ä?

³⁴ Dxejc räjp Jesús lojreni:

—Lo guedxliujre ruchṅaa rebejn, rudeedzaren i xindxa'preni ruchṅaa.

³⁵ Niluxh rebejn ni agule Dios te chääreni xhaguibaa, näjza te guibaṅsacreni loj rebengut, di reni'c guchṅaa, dizaren i gudeed xindxa'preni guchṅaa,

³⁶ sa'csi diru gac guetreni, anajczeni si'c najc rexangl Dios. Laaren i najc xi'n Dios sa'csi abaspaṅsac Diosreni.

³⁷ Moisésli basule' xcuent ni rbaṅsac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacob”, ni'cni nabajṅpacreni lo Dios.

³⁸ Sa'csi di Dios gac Xtios rebengut; najcni Xtios rebejn ni nabajṅ par tejpas, sa'csi par laani guiraa rebejn nabajṅ.

³⁹ Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

⁴⁰ Sa'csi diruren i niajx niniabdiidxruren i lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—¿Xho mood rniiren i Crist najc xi'n toDavid, ä?

⁴² Ni lagajc toDavid bacuaa lo reguijtz ni laa reSalmo:

Dad Dios räjp lo Xstadä:

⁴³ “Gurej xladbeä cheni guidzujnli dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

⁴⁴ ¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluii leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebejn cagucuadiajg che räjp Jesús loj rexpejn pacni:

⁴⁶ —Colyajp cuidaad reni ruluii leii, sa'csi rdxagljazreni rajcwreni lajd siool, rlajzreni saru guinii guiraa rebejn “xchan” lojreni, rlajzreni jiu bejnreni nez loguii, rlajzreni cuereni lo reyagxhilsa'c neñ reguidobäz, näjza cadro rajc lanij.

⁴⁷ Rudzucajzaren i rexhixten regunabiuud, dx-
ejc rolreni rele' siolduxh che rniabreni lo Dios te fii rebejn, te naa bejn najcreni beñdxan, luxh lojreni suxhal Dios te castigwroru.

21

Gojn xten te gunabiuud

(Mr. 12:41-44)

¹ Neñ guidoro bahuii Jesús cagusäl rebenrajp gojn neñ te guijn cadro rdojp gojn.

² Bahuiizani lo te gunabiuud, lacti proobni. Basäl ni xcojn ni neñ guijnga, tio'ptis melbäz basäl ni.

³ Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn,

⁴ sa'csi guiraa redec ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵ Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c nacheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

⁶ —Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

Reseen ni chu che nitloj guedxliuj

(Mt. 24:3-28; Mr. 13:3-23)

⁷ Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸ Räjp Jesús lojreni:

—¡Colsusin te na'c gusgueereni la'tu! Sa'csi xhidajl reni jiäd sinii: “Narä nacä Crist”, o “Asiädgajxh redxej che jiädni”, per na'c chalilajztu xtiidxreni, na'cza chanajltureni.

⁹ Luxh che jiejn diajgtu cayajc guer cadilnä j sa' bejn, na'c guidxejbtu, sa'csi ganid recosga gac, luxh gad galdi nitloj guedxliuj.

¹⁰ Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn.

11 Sajcza xuro, su' gubijn, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

12 'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo rebeñ guidobäz, susälzarenı la'tu neñ latzguiib, sinäzarenı la'tu nez loj reii näjza gubernadoor sa'csi rinälajztu xtidxä.

13 Luxh guiraa dee sajctu te gac gusule'tu xtidxä lojreni.

14 Na'c gunxgaatu xhigab neñ lastootu xhini'c guiniitu lojreni,

15 sa'csi narä sunidxä diidx guiniitu, sunidxäza yälñajn lojtu te digac gudzu'reni diidx lojtu niclaza gacdi guiniyajreni xtiidxtu.

16 Näjza rexcuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni.

17 Guiraa rebejñ guedxliuj sibälaz la'tu sa'csi rinälajztu xtidxä.

18 Niluxh ni'cla tej xquidxejctu di nitloj.

19 Luxh palga sutijptis lajztu, sajptu yälñabajñ par tejpas.

20 'Che fiitu tre' xhidajl soldaad guideb gabi guedx Jerusalén colyacbee abidzujñ dxej ni guibijlñi.

21 Dxejc reni yu' guedx Judea, nanab guxunreni chacuatzlojreni neñ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga,

22 sa'csi neñ redxejga sujn Dios fis lo guejdxga te soob rediidx ni caj lo reguijtz xten Dios.

²³ Probe'za regunaa ni nuu báz neñ redxejga, nájza regunaa ni ca' báz, sa'csi su' yälhuinduxh lo guedxliuj, nájza fis ni gun Dios loj rebejn̄ga.

²⁴ Yu'reni guet lo guer, yu'zareni cháa pres, sijreni balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn̄ ni di gac xpejn̄ Israel.

Cheni jiääd Xi'n Niguii

(Mt. 24:29-35, 42-44; Mr. 13:24-37)

²⁵ Räjpzani:

—Dxejc su' seen lo gubijdx nájza lo bäii, nájza loj rebajle' ni yu' xhaguibaa. Luxh lo renacion guedxliuj su' rebejn̄ yärsia', di jien̄ xhi gunreni, sidxebduxhreni sa'csi siejn̄ diajgreni chubeduxh lo nisdoo, säsduxh nis ni räjs lo nisdoo.

²⁶ Sitiol̄ rebejn̄ xcuent yälrdxebduxh che gunreni xhigab xhicharuni'c gac lo guedxliuj, sa'csi náj guideb guibaa sinibsejs.

²⁷ Dxejcti suhuiireni lo Xi'n Dios ni gujc Niguii, siäädni lo te za guideb xcälrnibeeni, nájza yälrdimbichaduxh.

²⁸ Che gisloj gac recosre, col̄sutijp lajztu, col̄guiliäs yejctu, col̄guibalajz sa'csi asadzujn̄ dxej gusilajztu.

²⁹ Guniizani stee cuent lojreni, räjpni:

—¡Col̄huii lo yagiigw nájza lo guiraa reyajg!

³⁰ Che fiitu acabääni be'n, col̄yabee lagajc la'tu, abidzungajxh bäii nisguij.

³¹ Sigajcza che fiitu agusloj cayajc recosre, col̄yabee asiäddzujn̄ xcälrnibee Dios.

³² 'Rniliäpac lojtu, guiraa recosre sajc ansde guet rebejn̄ ni yu' naj.

³³ Guibaa näjza guedxliuj sinitloj, rextidxä dini nitloj.

³⁴ 'iCol̄susin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gachee che bidzuj̄n dxejga.

³⁵ Sa'csi si'c sidzuj̄n dxejga loj guiraa reben guedxliuj.

³⁶ Col̄susin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguui.

³⁷ Rdxee ruluii Jesús nen guidoro dxejc guxhijn sajia'nni yejc dan Oliib.

³⁸ Rsilru ristie rebejn te rdzuj̄nreni lo Jesús nen guidoro casob rsil, te gucuadiajgreni rextiidxni.

22

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Siäddzujungajxh dxe lanij che rajwreni yätxtiil ni di säguj, laaza lanijga pascw.

² Dxejc reni rnibee loj rebixhojz näjza rebejn ni ruluii leii caguuilreni xho gunreni te ju'treni Jesús, sa'csi rdxejbreni rebeñguejdx.

³ Dxejc biu' bendxab lastoo Judas ni laaza Iscariote, ni najc tej retzubitio'p xpejn pacni.

⁴ Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni.

⁵ Dxejc bibalajzreni, bia'nreni diidx gudeedreni meel lojni.

⁶ Cuäjbtı Judas, dxejcnı guslojni caguiilni xho gunni gutedni Jesús ladzñaareni che rut bejnđi suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzujn dxe lanij che rajwreni yätxtiil ni di säguij, che rugu'tzareni te xiil si'c ni caj lo xleii toMoisés.

⁸ Dxejc baxhal Jesús Pedr nájza Juan, rájpnı lojreni:

—Colchayejn xchej xten pascw te guidaununi.

⁹ Dxejc laareni gunabdiidxreni lojni, rájpreni:

—¿Caro rlajzlu choyennuni?

¹⁰ Rájpnı Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlnı, coljiu' rolijz bejnı cadro jiu'ni laani.

¹¹ Dxejc colye'tz lo bejnı ni najc rolijznı ro'c: “Si'c naj Dad Mastr: ¿Con yu' cadro sajc gauxchenää rexpenä naj pascw?”

¹² Dxejc guluiini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn xhi guidaunu.

¹³ Sä'tireni. Si'ctis ni rájpnı Jesús lojreni, si'cpac bidxälreni. Dxejc bejnrenı xchej xte lanij pascw gaureni.

¹⁴ Che bidzujn or, gurenäj Jesús rexpejnıpacni lo mex.

¹⁵ Dxejc rájpnı lojreni:

—Guyuduxhä gaan gaunääpactu xchej xten pascw ansde tedä trabajwduxh.

¹⁶ Sa'csi rniä lojtu, diruna gaunää la'tu pascw cheni guidzujnli dxej ni gacni lo xcälrnıbee Dios.

17 Dxejc cua'ni te co'p, badeedni xquixtios lo Dios, räjpni:

—Colyä' dee, colgudeedni lo sa'tu.

18 Sa'csi rniä lojtu, diruna yä'ä nis ni rii yejc uub stehuält cheni guidzujñli xcälñribee Dios.

19 Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

20 Si'cza bennäjni co'p che gulujx gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

21 'Per bahuilaare, bejn ni guto' narä sobganäj narä lo mexre.

22 Guliipacni, Xi'n Dios ni gujc Niguui sinuu tedni loj nezyuj ni abaluii Dios lojni. Luxh proobza bejn ni guto' narä.

23 Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

24 Sas gusloj cayejyreni, don chuni'c guibee gac beñro lojreni.

25 Dxejcti räjp Jesús lojreni:

—Reñei ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rniñ lacti hueen najc reñeiiga.

26 Per la'tu na'c gactu si'c. Nani najc bengoolru lojtu, ni'c riäjñ gacni si'c najc ni huinru lojtu. Luxh nani rnibee riäjñ gacni si'c mos.

27 ¿Chuni'c sajcru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

28 'La'tu najctu ni gusunäj narä guideb ni gudedä retrabajw ni gudedä.

29 Ni'cni narä runidxä yälrnibee lojtu sigajc ni baniidx xtad yälrnibee loä,

30 te gautu, yätu lo xmexä xhaguibaa, te cuezatu lo yagxhil cadro guntu yäl_guxhtis loj rexpejn guitzubitio'p rexagdoo Israel.

*Räpxgaa Jesús di Pedr guicäj p numbeeni
(Mt. 26:31-35; Mr. 14:27-31; Jn. 13:36-38)*

31 Räj p Jesús loj Simón:

—Simón, Simón, agunab beñdxab ni laa Satanás luj te gusniibni luj si'c rusniib bejn xob te jiani.

32 Narä agunabä lo Dios xcuentlu te na'c jiäädx xcälirililajzlu. Luxh luj che gusiejch lajzlu, guibi'lu, bastioob lastoo resa'lu.

33 Räj p Simón lojni:

—Dad, narä sirinalälu; mase gusäureni luj latzguiib, näjza narä siäunäälü; mase ju'treni luj, näjza narä setnäälü.

34 Dxejcti räj p Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu chonli huält, dipaclu gumbee narä.

Nanab soob rediidx ni bacuaareni xcuent Jesús

35 Dxejc gunabdiidx Jesús lojreni räj pni:

—Che ganaxtu baxhalä la'tu, xhet bolsdi sanätu, nicla carterdi, niclaza stee gura'chdi, ¿la yu' xhi biquintu, xhi biäädx lojtu, ä?

Dxejc räjpreni:

—Xheti.

³⁶ Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni.

³⁷ Sa'csi rniä lojtu, sisiojb rediidx ni caj lo reguijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

*Rbedx-rniab Jesús loj Dios
(Mt. 26:36-46; Mr. 14:32-42)*

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni.

⁴⁰ Che bidzujnreni ro'c, räjpni lojreni:

—Colcuejdx, colnab lo Dios te na'c jiajbtu lo dojl.

⁴¹ Dxejc gubicaj Jesús lojreni, huijni te lajt zite' cadre suga'reni, si'cti cadre rdzujn te guij che rucuaanini. Ro'c bazuxhijbni, gurejdx-gunabni lo Dios,

⁴² räjpni:

—Xtadä, palga rlajzlu, baslaa narä loj trabajw-duxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejc biricaj te xangl Dios lojni te badeedni yälrutiplajzni.

44 La_lni cadejdni trabajwduxh, cayac-huinduxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

45 Cheni huisuni, gulujx gurejdx-gunabni lo Dios, huijni cadre suga' rexpejn_{pacni}. Ro'c bidxälnireni nagayejs guiraareni sa'csi cayac-huin lajzreni.

46 Dxejc räjpni lojreni:

—¿Xhicuent nagajejstu? ¡Co_lchastie! ¡Co_lnab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn. 18:2-11)

47 La_l ni canii Jesús lojreni, bidzujn xhidajl bejn. Tej rexpejn_{pacni} ni laa Judas, nijdni nez loj rebejnga. Dxejcti gubigni loj Jesús, te bachagro'ni loj Jesús.

48 Dxejc räjp Jesús lojni:

—Judas, ¿la con te yäl_ruchagro' rutedlu Xi'n Dios ni gujc Niguii ladz_naa rebejn_{re}, ä?

49 Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

50 Sas tej rexpejn Jesús gudil_näj te mos xten ni rnibee loj rebixhojz, batiu'ni diajgni ladbee.

51 Dxejc räjp Jesús lojreni:

—¡Agujc! ¡Co_lgusaanreni!

Dxejc gudajn Jesús diajg mosga, basiajcnini.

52 Gunigajc Jesús loj reni rnibee loj rebixhojz näjza reni najc guixhajg xten guidoo näjza rebe_{ngool}, guiraa reni siädxii_{nini}, räjpni:

—¿La siäd_nätu spaad näjza garo't, astoocanu siädxii_{tu} te gubaan, ä?

⁵³ Cheni suga'a lojtu guixe-guixee nen guidoo, ditu nuhual narä. Per dee najc xortu, luxh arnibee yälñacäy la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädnäj Pedrni zit-zijt.

⁵⁵ Che bidzujñreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c.

⁵⁶ Dxejc te gunaa ni rujn dzuun ro'c, che bahui- ini sobga' Pedr ro'c, rdxelajtisni lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejñ lojni, räjpni lojni:

—Näj luj najclu te rexpejñni.

Per Pedr räjp lojni:

—Gurniälojlu, Dad, dina gacä xpejñni.

⁵⁹ Che gudejd si'cti teb or, räjp stee bejñ lojni:

—Guliipacni, näj bejñre guyunäjni, sa'csi laani najczani te beñ Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgäii,

⁶¹ luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni:

“Che gajd guidgaii cuedxa', abazuni'lu choñ huält, räjplu dilu gumbee najrä.”

⁶² Dxejcti guc-huin lajz Pedr, biriini ro'c, ron-duxhni.

Rniyajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj cagux-hisnäjrenini, caguijnzarenini.

⁶⁴ Dxejc basäureni lojni, gudajpreni lojni, räjpreni lojni:

—¡Gunii chuni'c gudijnlu!

⁶⁵ Luxh guiraloj cayäjbreni lojni, caniyaduxhrenini.

Bidzunäjreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee, näjza reni rnibee loj rebixhojz, näjza rebejn ni ruluii leii, huinäreni Jesús te suuni nez lojreni neñ yu' cadro rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpnj:

—Palga guicäpäni, ditu chalilajz.

⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga loä.

⁶⁹ Per najli sibej Xi'n Dios ni gujc Niguii xladbee Gueb Dios ni yu' xhaguibaa.

⁷⁰ Dxejc gunabdiidx guiraareni lojni, räjpreni:

—Mbj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpnj:

—Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraareni, huinäreni Jesús nez loj Pila't.

² Ro'c guslojreni cabe'creni xquejni, räjpreni:

—Bidxälnu bejnre cayujnni bieje lo rexpeljnu. Räjpzani xhet nanabdi quiixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, räjpni:

—¿La luj ni najc reii xten rexpelj Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcäl̄ruluiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni: “¿La Galilee siäd bejnga?”

⁷ Cheni räjpreni ro'c siädni, baxhalnini loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén.

⁸ Che bahuii Herodes loj Jesús, bibalajzni sa'csi agujc xchej rlaizni fini lojni, sa'csi abiejn diagni diidx xcuent ni cayujni. Luxh rlaizni fini gunni te milaagwr.

⁹ Xhidajl yälgunabdiidx bejn Herodes, luxh xhet guniidi Jesús.

¹⁰ Ro'c suga'za reni rnibee loj rebixhojz näjza rebejn ni ruluii leii, cabecduxhrureni xquejni.

¹¹ Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhašacrenini loj Pila't.

¹² Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dxejc gurejdx Pila't reni rnibee loj bixhojz, näjza rebeḡool ni najc guxhtis, näjza rebeḡuejdx.

¹⁴ Dxejc räjpni lojreni:

—La'tu biädnätu bejnre loä, najtu caguquilni rebejn gunreni bieje, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni.

¹⁵ Niclaza Herodes di nidxäl nicla tej dojl, ni'cni baxhašacnini loonu, luxh abahuiitu xhet dojldi bejnini te guetni.

¹⁶ Ni'cni quinäni, dxjecti guslääni.

¹⁷ Najc costumbr rusläa Pila't te bejn ni yu' nen latzguiib casob rajc lanijre.

¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, basläa Barrabás!

19 Barrabás najc ni basälreni latzguiib sa'csi ba-tojpni te cuaa bejn ni bacuanäj resoldaad xten Rom, näjza sa'csi yu' chu bagu'tni.

20 Rlajzpac Pila't gusläani Jesús, ni'c gunisacni lojreni,

21 niluxh rebejn dipru guredxa'reni, räjpreni:

—¡Bacuaani lo crujz, bacuaani lo crujz!

22 Riojn gunisac Pila't lojreni, räjpni:

—¿Xhi doľduxh bejnni? Xhetľidi dojl rdxälä bejnni te guetni. Ni'cni siguinäni dxejc suslääni.

23 Luxh laareni sanuutis guredxa'reni, gunabreni xcajni lo crujz. Luxh sa'csi guredxa'tisreni, bejntireni gaan gujc si'c ni rlajzreni.

24 Dxejc cuäjb Pila't gunibeeni gac si'c ni gunabreni.

25 Dxejc basläani bejn ni yu' latzguiib sa'csi bejnni bieje, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

Che cuaj Jesús lo crujz

(Mt. 27:32-44; Mr. 15:21-32; Jn. 19:17-27)

26 Cheni sanäreni Jesús xcaj lo crujz, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini crujz, siädnaļltini dejt Jesús.

27 Siädnaļlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús.

28 Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu.

²⁹ Sa'csi sidzujn̄ dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.”

³⁰ Dxej guisloj rebejn̄ gäb loj redajn: “Coljiajb yejcnu”, säjbzareni loj relom̄: “Colgucua'tz nuurnu.”

³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzareni tio'p beñguijdx xcajzareni loj recrujz, guetnäjreni Jesús.

³³ Che bidzujn̄reni te lajt ni laa Calabeer, ro'c bacuaareni Jesús lo te crujujz, bacuaazareni guiro'p rebeñguijdxga lo stio'p crujujz, tejni xladbee, steeni xladbäjgwni.

³⁴ Cheni cagucuaa rebejn̄ reni lo crujujz, gunii Jesús, räjpni:

—Xtadä, badzucaj xtoj̄l rebejn̄re, sa'csi direni gan xhini'c cayujn̄reni.

Dxej gudzujt resoldaad daad yejc xhajbni, te gudisreni xhajbni cua'renini.

³⁵ Suga' rebejn̄ ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn̄ baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badeedreni bin-nii yäni.

³⁷ Dxej räjpreni lojni:

—Palga guli najclu rei xten rexpejn̄ Israel, baslaa lagajc luj.

³⁸ Luxh bacuaareni gaii diidx loj te baräjd ni cuaj yejc crujujz. Con didx griegw, con didx latín, näjza didx hebreo, bacuaareni scree: “Dee najc Reii xten rexpen̄ Israel.”

39 Te reben̄ guijdx ni najl lo te cruzj ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

40 Per beņguijdx ni najl lo cruzj stelaadga gu-didxa'ni loj stee beņguijdx ni caniyaj Crist, räjpni:

—¿La dilu guidxejb Dios? ¡Ni cayajczalu tejsi castiigw!

41 Per nuurnu cayajcnu castiigw ni riäj̄l gacnu te guidiixnu redojl̄ ni biennu. Luxh laani xhet dojl̄di bejn̄ni.

42 Dxejc räjpni loj Jesús:

—Bazalajzlu narä che guidzujñlu lo xcäl̄rnibeelu.

43 Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäj̄lu narä xhaguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

44 Agojl̄ si'cti läidxej. Dxejc bicäjy guideb guedxliuj, si'c bianxcäjy si'cti rcachonti.

45 Bicäjy lo gubijdx, luxh ladró ni najl neņ yudx-anro xten guidoro, biräjsni gucni tio'p la'.

46 Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

47 Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojl̄di bejn̄ bejn̄re.

48 Guiraa rebejn̄ ni suga' ro'c ni bahuii guiraa ni guzajc ro'c, gubi'reni rolijzreni, cayääzreni lagajc lastooreni.

⁴⁹ Luxh guiraa reni rumbee Jesús, näjza regunaa ni biädnaĵni che biriilini Galilee, zijtru bia'neni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laaca rujnni guira'ti. Siädni guedx Arimatea, región Judea. Nadxaagzani loj reni rnibee nen guidoro xten rexpejn Israel.

⁵¹ Cabäjzza José jiaäd yälrnibee xten Dios, ni'cni dini nidxaglazj nani bejn resa'ni.

⁵² Dxejcti huijni lo Pila't, gunabni tiejxh Jesús.

⁵³ Che gulätnini lo cruĵz, batejbnini nen te bariaad, dxejcti bacua'tznini nen te baa ni gucchee cuä' te guilaj. Nacoob baaga, nicla tej bejn gajd guiga'tz ro'c.

⁵⁴ Dxejga najc dxej ni rusucbeereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga nen baa.

⁵⁶ Che gubi'reni rolijzreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaarenı retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24

Che gubansac Jesús lo rebengut

(Mt. 28:1-10; Mr. 16:1-8; Jn. 20:1-10)

¹ Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni.

² Che bidzujñreni, bahuiireni agubicaj guij ni rusäu ro' baa.

³ Dxejc che biu'reni neñ baaga, direni nidxäl tiejxh Jesús.

⁴ Lañ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhabreni.

⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajn lo rebenğut, ä?

⁶ Rutini ree. Agubañsacni. Colğusnaj lajztu redidx ni guniini cheni guyusijcni Galilee,

⁷ che najni lojtu: “Riäjñ jiajb Xi'n Dios ni gujc Niguii ladzñaarebenğojñ, xcajzani lo cruzj, dxejc ni riojñ dxejga sibañsacni loj rebenğut.”

⁸ Dxejc banaj lajz regunaa xtidx Jesús,

⁹ biriireni robaa, gubi'tireni te bijreni diidx lo retzubiteeb rexpejñpacni näjza loj rebejn ni yunäjreni.

¹⁰ Reni huisa'n diidx loj rexpejñpac Jesús najc redee: Marii Magdalenñ, näjza Xuan, näjza Marii xnan Jacob, näjza sgaii gunaa.

¹¹ Niluxh rexpejñpacni bejn xhigab didxnayäälñi, direni nililajz xtidx regunaaga.

¹² Dxejc huisu Pedr, ruxunñlini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolijzñi, rdxelojtisni xcuent ni gujc.

*Ni guzajc lo nezyuj ni sii guedx Emaús
(Mr. 16:12-13)*

¹³ Lagajc dxejga, tio'p rexpejn_upacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén.

¹⁴ La_l ni sasajreni lo nezyujga, cayujyreni diidx xcuent reni gujc ro'c.

¹⁵ La_l ni caniireni gubig Jesús lojreni, gusloj sasanäjnireni.

¹⁶ Luxh mase cahuiireni lojni, yu' xhi badxojn niembeerereni.

¹⁷ Dxejc gunabdiidx Jesús lojreni, räjpni:

—¿Xhini'c rujytu la_l ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpni:

—Guiraasi bejn najn xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, rajpni yäl_urnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn.

²⁰ Näjza xho bejn reni rnibee loj rebixhojz näjza rexcuxhtisnu, bateedrenini ladz_{naa} reni gunibee guetni, dxejc bacuaarenini lo cruzj.

²¹ Niluxh nuurnu cabääznu laani gacni nani nus_{laa} rexpejn Israel ladz_{naa} rebenzijt. Naj agujc choñ dxej ni gujc recosre.

²² Luxh yu' gaii gunaa ni nadxaag loonu ni baschelorejreni nuurnu. Barsil, che huijreni robaa xtenni,

23 direni nidxäl tiejxhni. Biädsä'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebeḡgut.

24 Dxejcti huihuii gaii sa'nu robaa, bahuiizareni najcni si'ctis ni naj regunaaga loonu, niluxh direni nuhuii loj Jesús.

25 Dxejc räjp Jesús lojreni:

—¡Lacti nayääl tre' xcäriejntu! Lacti neḡ rililajztu xtidx redade' ni gunii xtidx Dios xcuent Crist.

26 ¿La di nungäjl tedxgaa Crist retrabajwduxhre dxejcti jiu'ni lo xcälrdimbicha' Dios, ä?

27 Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

28 Che bidzujḡreni guejdx cadre sääreni, bejn Jesús si'cni chanuuni chääni lo nezyuj.

29 Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxej, agojl jiu' guxhijḡ.

Dxejcti biu' Jesús te jiannäjnireni.

30 Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni.

31 Lagajc dxejc, baxhal Dios balojreni, biembeereni Jesús, dxejc laani gunitlojni lojreni.

32 Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

33 Dxejc dirureni nibäjz ro'c, alga gunasgajczeni nez, gubi'reni guedx Jerusalén. Ro'c bidxälreni abidojp xpejnḡpac Jesús näjza sgaii bejn.

34 Dxejcti bijreni diidx loj guiro'preni bidzujn, räjpreni:

—Guliipac gubaṅsac Jesucrist, luxh baluilojni loj Simón.

35 Dxejc guiro'p reni bidzujn bijzareni diidx ni gusajcreni lo nezyuj, näj xho biembeezareni Jesús che gula'ni yätxtiil.

Baluiloj Jesús loj rexpejn pacni

(Mt. 28:16-20; Mr. 16:14-18; Jn. 20:19-23)

36 Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Colcuedxi lajztu!

37 Per laareni rdxeløjreni bidxejbreni, naareni cahuiireni lo te sprit.

38 Dxejc räj p Jesús lojreni:

—¿Xhicuent cadxejbtu? ¿Xhicuent rac tio'p las-tootu?

39 ¡Colhuii reṅaä, näjza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääł niclaza tzujt si'c rapä narä.

40 Che guniini rediidxga, baluigajcni reṅaani näjza reni'ni.

41 Lał ni cadxelojreni, di gacdi chalilajzreni, sa'csi cabaduxh lajzreni, räj pni lojreni:

—¿La yu' xhi rajptu gauä ree, ä?

42 Dxejc badeedreni te la' bälbigue', näjza te la' seer ni yu' tzujn.

43 Ni'c cua'ni gudajwnini nez lojreni.

44 Dxejc räj pni lojreni:

—Dee najc xtidxä ni rniä lojtu cheni yusicä lojtu, rniä riäjł soob guiraa rediidx xcuentä ni caj lo xleii

Moisés, nájza lo rexquijtz redade' ni gunii xtidx Dios nájza ni caj lo rexquitz Salmos.

⁴⁵ Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni.

⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn dxej, guibaṣacni loj rebengut.

⁴⁷ Sire'chza diidx xcuent xho ruslaa Crist rebejn neṅ dojl che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

⁴⁸ La'tu najctu testiigw guiraa recosre.

⁴⁹ Narä suxhalä Sprit Dxaṅ xten Dios lojtu, ni'c coljia'n guedx Jerusalén cheni jiädläjzlini neṅ las-tootu, guniidxni yälrnibee ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ṅaani, benle'ni yejcreni.

⁵¹ Laḷ ni cayujnni si'c, gubicajni lojreni, huäjsni xhaguibaa.

⁵² Peta laareni gulujx gojnrenini, dxejc cabalaz-duxhreni gubi'reni guedx Jerusalén.

⁵³ Ro'c guixe-guixee guyu'reni neṅ guidoro, calä'preni xpala'n Dios. Sugacni si'c.

**Xtidxcoob Dios ni biädnä dad Jesucrist
New Testament in Zapotec, Mitla (MX:zaw:Zapotec,
Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

5cff1274-8dc3-5398-a94d-f6033bb363c9